

戊寅嘉平月有七

日思况賸壽

趙彥修李梅  
嘉慶  
西庚十七年壬申生



呵賸

梁肇煌題籤



光緒八年季冬

三硯齋詩賸

梁肇煌題

三硯齋詩賸

余弱冠後以應學使者歲科試學爲古今體詩苦乏根柢  
僅取 國朝阮亭竹垞藏園仲則諸稟沿仿爲之幼時授  
讀漢魏三唐詩大半遺忘故所爲率病膚淺中年應試京  
師南北奔走遂棄不爲同治丁卯由崇川量移金陵曾文  
正公設書局於冶城在學署之左書局中諸耆宿多工詩  
者自此唱答遂多然性懶散不肯存稟篋中故無一詩也  
今年七十有一矣離羣索居意緒煩懣同人遂請收拾詩  
稟以遣岑寂陸續將所題贈舊稟寄還爰命外孫姚元壽  
三壽錄成清本不過舊稿千百中之什一也題曰詩賸以  
誌屢年蹤跡云光緒壬午九月今悔道人丹徒趙彥修季  
梅甫自記于冶山草堂

詩賸

三硯齋詩賸

參定諸家姓氏

全椒薛慰農時雨

瑞安孫琴西衣言

瑞安孫藻田鏘鳴

鄞縣趙粹甫佑宸

南匯張嘯山文虎

太湖趙梓芳繼元

閩縣陳幼蓮宗濂

武昌范月槎志熙

海昌陳小浦方坦

秀水李芋香嗣泌

詩賸

丹徒韓叔起弼元

績溪胡子繼培系

江都沈戟門榮

上元楊樸庵長年

桐城蕭敬甫穆

上元胡煦齋恩燮

江甯李東原泰封

江甯梅少庵壽康

丹徒吳莘農紹伊

丹徒戴笠樵以珣

三硯齋詩贖

校訂門人姓氏

震澤吳望雲仁傑

吳江費吉甫延慶

吳江費芸舫延釐

江甯方子涵培容

上元朱崇嶧桂模

江甯甘劍侯元煥

上元秦伯虞際唐

江甯陳雨生作霖

上元陸椿生春官

上元吳獻齋家修

詩贖

長白小邨承蔭

上元吳寶齋家珍

丹徒吳芷舫誦清

丹徒吳巽儀佑曾

仁和姚械卿士璋

姪徵禾聘山

姪燧禾森甫

三硯齋詩賸

題詞

弟彥偁君舉

大雅久云萎四始恆偈規魏晉率主奴唐宋爭驅馳荒荒各  
遲凡質質羣執辭愚擬詩率性性正罔不宜色聲基之情情  
至性弗漓觀彼莠莠者術譎藝亦夷滯古冒首格蔑古騁懷  
私汨俗冒譏評叫噓膺警訾雅懷盡掃地哲士疇其尸我兄  
受殊稟於古靡不窺餘事事歌詠功力深磨治三唐競饜飮  
六代仰慕追意專力無迂識積功潛移晚學嗜浩叟西江水  
流危骨相晁陳避風旨王蘇知所執又非一旁羅斑陸離蕭  
楊暨范陸鑽研皆吾師味永諫果謝詞高枯桐推一唱再三  
息十讀千百思吾鄉盛壇坫觴詠紛追隨鮑海門余江干立旗鼓  
李小花王夢張旗麾一時震名字後來沫音徽旨薄趣不遺識

題詞

卑情易歧陳陳率相習末學爭腐齒我兄奮然起力擲千金  
椎寂者發以覺頑者驚其痿雲霞蔚林木風雷鼓塘陂賤軀  
困疾苦夢穀縈光儀願兄毋自祕付槩慎勿遲蕪語謹上納  
瓣香某在斯



弟彥偁君舉

三硯齋詩賸

丹徒 趙彥修 季梅

戊午二月省家兄次梅興化作

少年並繼入詞場歲晚歸來兩鬢霜烽火連綿桑梓淚人天  
寥落鶴鴿行無多意興難忘酒最好光陰是對床匣劍光芒  
消澁盡一燈竹屋溯行藏

頤園藤花歌為梅卓庵通議續高作用竹垞紫藤花下

醉歌韻

虬龍盤屈出檐椽仙植不隨霜雪槁花開招客飲壺觴生怕  
春光去草草頤園主人有花癖花徑朝朝為客掃桐枝瘦削  
青琅玕榴萼折開紅瑪瑙同朱華照夏豔欄檻丹實經秋盈  
栲栳昔年歷下宰赤縣燭照不殊明鏡泉家家梨棗爭饋獻

詩賸

處處桑麻豁襟抱東國謳思芟舍長南中瀟灑清樽倒晨鬢  
手汲那辭勞卯飲歡呼不嫌早座中白髮神仙裔謂南昌梅丈丹叔  
把酒看花未為老萬千寶瓊娛嘉賓有似羣真集蓬島我到  
金陵逾七稔歲歲酒痕污裙襖由來散士樂松筠差對英髦  
詠芹藻行買江皋二頃田自覺竹籬茅舍好竹垞醉歌首句未押韻惜抱用  
竹垞韻首押  
僚字從之

六月七日同吳宗維親家學城游元武湖看荷花是日

遇雨遂宿湖神廟二首

采采碧雲暮扁舟元武湖夕陽帶樓閣涼月浴鷗鳧勝地盡  
觴便清游少長俱臺城知不遠覽古意踟躕同往有章星南鳳章  
幽興未云已雲房容暫栖水蚊經雨少野鶴隔烟啼曙色在  
窗紙清香生杖藜誅茆如可必投老向湖畦

十二月十九日張嘯山學博

文虎

招同孫琴西

衣言 粹

慰農

時雨

兩觀察錢子密吏部

應溥

陳小浦主政

坦唐端甫文學

仁壽

集飛霞閣作東坡生日同用翁

覃溪題顧氏辟疆園東坡像拓本韻

春光未到一百五玉梅窗外紛交加仙乎鶴斃下人世清絕

魚筍如山家酒酣脫帽笑髮禿詩澁繞檐頻手文寄語山厨

勤料理白公坐日薦椒花

題陳寄舫司馬臨暉南田夜山圖

清溪隨棹轉幽絕水村圖渡口月初上蘆中人可呼秋光歸

淡泊夜色費吟摹嗜古澄江叟高懷世所無

夢中作

鶴髮仙人拍手迎海山樓閣雪初晴壺中日月忘塵劫眼底

詩贖

山河一戰杯自覺名場如屣脫終期藥鼎證丹成杖持綠玉

朝天去紫府逍遙不世情

題乾元萬壽宮潘真人冠履圖

掛冠神武清風峻賣屨山中隱趣長何似真人留幻迹不知

塵世有滄桑

吹簫昔是仙人館

余學署在冷城山爲朝天宮舊址

懸磬今爲博士齋大好

江山不歸去負他桐帽與棕鞋

題巴子藉書漁洋秦淮雜事冊爲孫澄之太守

文川作

記從丁字簾前過

道光辛卯年在金陵屢作秦淮之游

扇影簫聲月在天今日

白頭山閣裏但憑濁酒送殘年

招隱雲泉瀉幽壑鶴林竹樹照寒烟

漁洋游京口南山諸小記最工

平生愛

讀漁洋記不獨秦淮紀事篇



沈戟門學博

榮

招同楊石卿大令

鐸

高硯農明經

文煥

吳莘農典簿

紹伊

劉蒸甫大令

壽曾

誠甫上舍

顯曾

集補蹉跎室戟門詩先成次韻賦謝

嘉話今年續六同

先中憲舊藏張東海六同詩話卷咸豐庚申失於吳江葫溪廬次故交何

幸聚文雄襟懷各有千秋想觴詠聊存六代風入世行藏都

任運當筵賓主半成翁閉門只合談風月一醉陶然道未窮

招要齋閣一樽同牀上揮毫意氣雄

時戟門病足

未許詩編名腳

氣羣誇文檄愈頭風秋高不負黃花釀興劇都忘白首翁笑

我齋鹽甘送老虞卿不為著書窮

一到長干攬轡同詩龍酒虎各稱雄梅花江閣吟殘雪畫漿

秦淮盪晚風十載駒陰如轉轂幾人鶴髮已稱翁秋菘春韭

平生樂常共山樽興不窮

詩賸

三

門下經傳鄭小同

恭甫從戟門受經近更註左氏傳發揮家學

更兼詩筆代稱雄

昔人謂文為筆論心吳質多豪概把臂揚雲有古風酒價十千頻酌

我文名六一定推翁才郎並是豐年玉

謂令子仲衡

漫學昌黎送

五窮

題家藏周子京錦山水便面

崖傾地臥飛來石樹老身留上古苔邱壑迥非塵世有是誰

一笠撥雲來

同作

外孫姚三壽漢庠

長風吹動林間瀑積雨蒸成洞口苔此是衡峩奇絕處好

攜筇笠入山來

題李永之譽烟波釣艇

老木丹青寫暮秋晴川淪淪滑於油浴緣一棹隨波去眼看

青山不掉頭

題蔡松原嘉大壑松雲

流水似琴鳴曲澗晚烟如黛  
菴孤村山人家在雲深處  
一路松風送到門

寄題金山寺用吳莘農金山守風韻

岩岩塔勢浮初日隱隱鐘聲度  
碧霄塵夢不離清淨域鄉心  
多寄往來潮半天竹籟鳴寒翠  
一榻茶烟寫闐寥我縱無田  
歸亦好定從長老乞團瓢

飛雲閣晚望用前韻

冶城高處絕塵囂暮色蒼涼  
睇遠霄巖際白雲霏作雨樓頭  
黃葉下如潮三秋笳鼓增悲壯  
六代陵園付寂寥興倦歸來  
謀一醉霜菘入饌碧于瓢

詩賸

四

九月二十五日同人四松園看菊

策杖郊原喜盍簪秋光到眼老猶貪  
黃花已過節重九白髮相扶人兩三  
名士文章供太息前十日江南榜揭曉知交多被黜者野人籬落  
恣清談林亭日落歸鴉急簌簌生衣帶夕嵐

沈戟門學博吳莘農典簿招同人集冶山道院

天慶留遺構招遊及令晨舉杯忘世事  
入座盡詩人方外翁更生亦能灑脫見通隱  
笑談含古春過從逾十載白首尙如新

贈范月槎觀察志熙

聞道江淮治力殫龍門百尺喜瞻韓論詩  
未脫書生氣校士

還登大將壇公每月奉檄校閱兩江將士夜雨珠湖思短棹揚州清軍司馬向駐高郵

春風石鼓夢長安文章政事如公少  
寫入吟篇總不刊

家世青氈守固窮又移書策到江東  
平明山色浮琴硯落日

詩心付燕鴻破屋懷人秋似水高軒過我氣如虹誰知小草  
幽花意都在先生青眼中

月桂觀察有詩索和走筆答之

昨從桃渡問官奴不惜芳醪貴玉壺浪迹頻年羈白下敝居  
何日返丹徒居纔容膝如歐舫筆倘通神似顧厨生平詩文未留稿

車笠平生有韓范韓謂叔起自忘強末類封胡

秋葵飲器歌

器以犀角爲之琢鳴葵一枝約容酒升許蕊葉扶疏  
有奇致上平下銳以器觴客客盡飲乃還器主人是  
日余飲盡一器爰用朱竹垞銀槎歌韻賦之並仿其  
體主人爲胡煦齋太守愚覺是日乃光緒五年正月  
七日也

詩贖

五

今年人日好天氣愚園觴客娛心顏金盤玉盃屏弗御豈屑  
價值銀論鍔通犀一握計寸七雕鏤花萼繁枝刪我昔秋堂  
種鴨腳扶疏卸砌芙蓉斑山礬猶嫌雲粉膩水蕨亦覺溪毛  
鬪惟有牽牛翠椀酷相似露華涼挹銀河灣製成酒器具秋  
意奇葩高矗如雲鬢蝘蝓引注松液滿象鼻不數荷筒鸞座  
客傳觀歎未有恍如觴羽飛翩翾亦有兕觥許文穆亦有銀  
槎朱碧山良工手技擅奇特忠臣口澤經險艱流傳好事等  
金貝茲器鼎足參其間園中梅萼初吐秀閣外柳條如可攀  
傳花賭酒爵無算華胥一夢忘塵寰主人耽吟並愛客弦詩  
頌酒勤往還如余譴陋慙腹負亦復不棄同蒯萐春光潑眼  
杯在手有酒不飲如魚鰕亭亭秋卉妙刻劃不讓天府樽彝  
班况復壽卮開八秩兒孫綵舞妙且嫺黃花晚節邁凡豔愚

園勝事永永傳江關

山齋春暮偶書

棟花風起又春殘  
敕速空階倦倚欄  
三月鶯花如短夢  
十年裘馬憶長安  
洛中持節文章富  
費生芸舫視學河南山  
邑當官首蒞寒  
子樹禾司訓礪山寂寞元亭誰問字  
金經一卷翦燈看  
曙姚樞司訓常山

題辭慰農觀察江上晚霞圖

草堂幽寂蒔花藥  
地倚餘霞舊山閣  
餘霞閣在清涼山之西姚惜抱先生有記  
生高詠繼宣城  
江上詩情供硯削  
記得城東講舍開  
觀察在杭州湖  
上立東晚鐘一杵隔烟來  
低徊十載西泠夢  
又向秦淮數舉

杯

秋日擬杜陵五律四首並用其韻

擣衣

詩賸

已闕軍中信猶敲  
夜半砧鐵衣知徹  
骨霜杵劇憂心內  
府金錢匱空閨涕  
淚深元戎圍帳遠  
何處寄哀音

廢畦

蔓草侵何急急休  
令菜甲殘潤還資  
曉汲脆更待霜寒  
歇側除瓜架縱橫  
近藥欄平生羞肉  
食晚摘喜登盤

促織

起從青草岸驚醒  
白頭人脆與管絃  
別淒還燈火親隣  
雞伴終夕街柝已  
侵晨領取新秋味  
傳將詩句真

蒹葭

寥落天涯客停雲  
近若何迢迢申浦  
月謂楊君渺渺九江波  
樓庵請君載詠蒹葭句  
驚心霜露多家鄉  
足烟水歸計莫蹉跎

爲陳小浦主政題曾文正公乞龍井新茶手札

昔日浙閩辭節制知公生未履西湖帳廬月冷茶初沸卽是

風篁宴坐圖

龍井在風篁嶺

贈煦村司馬炳元

五十謝簪組還山覓舊蹊風聲黃鶴夢

君向官湖北

煙景白門隄

畫以觀梅悟詩還刻竹題平生耽習靜樽酒快招攜

絕勝半青閣羣山俯六朝秋雲生坐榻晴翠濕詩瓢余亦有

歸志故山云未遙何時隱巖竇希跡上皇樵

范月槎觀察以雨窗遣興詩索和未報復以詩催索晨

起拉雜書之聊抒胸臆云爾用原韻

平生孤調比雷丸頭白甘心苜蓿餐薄宦頻年如梗泛清宵

無夢到槐安舊交落落常相望來日茫茫已大難強欲戒詩

詩債積公弦不惜拂塵彈

詩賡

七

朝朝開徑望求羊日暮閒愁計斛量漫說採蘭酬令節何從

辟穀得奇方庭花寂寞如含怨

今年庭梅花甚稀

書冊縱橫畧備忘

何日歸田試農耒秋成宜稻更宜粱

年少清狂說吐茵老來無復記前因雲常人戶休言寂篋尙

餘裘未是貧太息風塵消壯歲難從仙佛證前身客來時復

談郵報頓忘消搖世外人

早春吟社忽傳書排日名園會屐裾最好守梅庭有鶴漫歌

彈鋏食無魚詩心聊結烟霞契琴韻難忘水石居

今春愚園之集頗數

水石居其

坐落也况復高平勲愛我敲門看竹屢停車

春柳用前韻

東風如剪月如丸楊柳樓頭色可餐金縷歌聲纏宛轉玉關

春訊遞平安眼波橫處懷人遠睂語飛來下筆難惆悵渭城

朝雨後碧紗深處淚珠彈

春來水閣儘相羊別恨綿綿計寸量烏雀聲喧千樹暗池塘  
水暖一匳方東風亭館愁如織舊雨河梁跡未忘寂寂柴門  
消永晝更無餘夢到黃梁

塞外春回草似茵鞭絲帽影記前因風前撼篷如傳恨道上  
鋪綿不療貧落日平隄遮馬路曉烟濃綠護鶯身關心束楚  
歸期近留贈前年出塞人

江上扁舟穩載書柔枝弱蔓拂輕裾橋經紅板聞調曲水漲  
青溪看打魚桑下時逢農婦宮桃花不遠故人居西津柳色  
濃如黛何日歸乘薄笨車

永濟寺有樹杪江聲閣今年三月泊燕子磯下訪閣無  
存次張文端公詩韻文端詩未見依丁辛老屋集和

詩賸

之

八

暮天催纜箬篷船訪古禪關落照偏佛屋蕭森清磬寂漁家  
三五破昏懸但看鸛鶴長空杳可有蛟龍白日眠山上何年  
飛閣起杖藜還結再來緣

王穀原先生原作

寒纜磯頭楚水船巖扃高上興猶偏鐘聲暮與江潮落王  
氣秋殘佛火懸陰洞歸雲龍暗蟄杪羅墜子鶴驚眠山僧  
漫話南朝事只結圓蒲一餉緣

春暮禪感

沈沈山閣集離憂悵惜年華付水流明月如銀親酒盞春寒  
似剪尙茸裘雪泥舊跡懷京洛臺榭芳塵慟應劉謂戴君子高周君孟  
輿炳燭餘陰嗟失學坐憑身世落浮漚

吳巽儀上舍佈曾送龍井茶用山谷以雙井茶送子瞻韻

相如晚歲苦消渴每思佳茗來澆書吳生贈我小團月風鑪  
日日看跳珠舉甌細瀨浮春腴甘同舌本諫果如廿年茶夢  
恍如昨一枕風篁明聖湖

以團扇贈戴笠樵上舍以珣詩以賸之次前韻

安道不屑王門趨閉門奉母兼讀書行文有似鷹脫鞴得句  
恍如龍戲珠今年雨少熱未除贈君緞扇團月如朱闌碧柳  
河上路清風招客如杯湖

宋鹿朝大令克昌自粵西歸送交趾肉桂賦謝次前韻

少年直北同公車十載粵西無一書宦成囊篋苦歎薄貽我  
上藥逾真珠我抱幽憂疾未除香爐茗椀參真如君如過我

詩賸

九

話疇昔與君牽芳元武湖

其二

良醫良相虛語耳架上空存活國書年荒穀賤典短褐安得  
急雨如翻珠田閒螭子漸次除高粱或者坵京如農家云得雨旱穀尙  
可種斯民廢疾霍然起余亦耕稼辭江湖

聞七夕

秦淮一水碧盈盈棹中流趁晚晴明月了無離別色好風  
猶送管絃聲江山到眼多秋意我輩消愁仗酒兵只恐天孫  
笑多事白頭愛賦少年行

初秋郭外用莘農晚泊觀音門詩韻

選勝出山郭臨流俯石磯鳥邊新吐月牛背尙餘暉羈宦苦  
多病離鄉空憶歸秋風漸淒冷料理到寒衣

恭甫大令同陳雨生孝廉作霖唐端甫文學招集飛霞

閣作白公生日酒間出示舊藏瀆川春泛圖用卷中

吳穀人祭酒韻賦謝

樊素櫻桃小蠻柳玲瓏詩句傳人口長慶風流閱四朝一樽  
重薦餘杭酒鍾山淡掃蛾眉青人在飛霞敞軒牖聯翩裙屐  
集東南遑論盧前與王後愧余白髮已飄蕭把酒看山忍辜  
負長嘯何知屋打頭痛飲不辭杯在手猜枚射覆略形迹天  
上詩仙笑人否酒酣出示瀆川圖短詠長謠無不有我住松  
陵十載多尋詩曾向蘇臺走木蘭堂中風露香山塘祠下蕨  
蕪厚烟月難忘昔日游丹青幸遇名賢守載詠京江耆舊篇  
卷中題詠藪人雅存錄夫並附長康名不朽圖係岷庵  
船山諸先生外多丹徒人顧係岷庵先生作讀畫  
弦詩樂永夕有似山陰逢癸丑山寮幽靜七容俱願借斯圖

詩賡

十

記某某杭州舊守

謂慰農  
觀察

返鄉國惜未壺天共銷受何當六

月祀歐陽醴酒湖亭共濡首

同作

海甯唐仁壽端甫

東風又綠秦淮柳幾處春人開笑口不見當筵月色裙祇  
餘鄉味梨花酒三層小閣晝焚香一朵仙雲晴入牖寶歷  
元年公刺蘇游蹤正繼杭州後紅闌三百九十橋刻意尋  
花那曾負李媚張態妝梳成摩篋擲筆不停手風光端屬  
紫薇翁兀自撚髭問稱否前水後水相續流歌舞云亾畫  
圖有一枝柔艣鬪纖腰不許沈酣喝月走生際乾嘉極盛  
時清豔能兼福真厚流傳此卷到青溪妙蹟由來要人守  
粉墨如新詩句香不與青山骨俱朽疏狂我漫湖唐寅賞  
鑑人應敵張丑如此江山不解吟寂寥後世誰知某某下



游人似昔無酬公此酒公其受樽前醉倒一杭民拋卻西湖重回首

胡煦齋太守恩煢招集愚園月榭觀察詩先成依韻和

之

桐杉疎落竹陰脩曲曲闌干俯碧流煙月儘供千日醉輕肥

不羨五陵游淺浮春意疎梅笑澹寫琴聲落木秋忽又相思

寄邗水西風消息託書郵是夕作寄劉恭甫書恭甫即前日愚園座上客也

澹烟疎柳拂晴波雅稱苔溪買權過宋胡元任著苔溪漁隱叢話愛客每

將三徑掃看花常賦百年歌樽前倍覺青山好鏡裏休驚白

髮多且寫新詩上屏幃山謠村簾不須呵

月榭觀察再疊前韻復和二首

感事懷人少蹇脩且隨裙屐說風流園中花鳥供詩料檻外

詩贖

十一

雲山當臥游難得嶺嶺千尺雪園中山石極工巧况兼風月七絃秋

歸來筆墨紛吟案料理音書付近郵江介友人信紛積皆親筆料理之

筆少鋒芒墨不波投詩猶幸有人過餘年只合著書老烈士

羞爲伏櫪歌世上烟雲真覺幻舊時縞紵已無多先生唵興

如泉湧爲續瑤華手屢呵

愚園題壁二首次主人韻

路入西園第幾灣層樓高與白雲閑濃雲團屋烟中樹晴翠

撲人江上山鶴爲耽幽成石隱烏勤返哺覓林還請看雪窖

回春候繞膝萊衣一色斑

十年留滯向周南爲訪巖居破曉嵐如此湖山真得地無邊

風月快清談庭多樂趣花常笑客有唵聲鳥亦諳只我空齋

太岑寂敲門看竹屢停驂

己卯寒食同人上清涼山謁一拂清忠祠遂飯於四松  
庵飯後復登翠微亭游眺至暮而返用昌黎寒食出

游韻

我生苦濕腰脚病每到春游興彌盛招邀友伴石城西柳帶  
桃緋交掩映雲深路曲巖屨顏興丁鼓勇勢相競茂林修竹  
帶餘清槐火石泉發高詠瓣香展謁鄭公祠一拂清風懍嚴  
正兩旁列享閩中賢文章氣節今誰更虺蛇百態付消凸胼  
蠶千秋信時命日未下春聞飯香小憇荒庵揮塵柄丞相祠  
堂去咫尺村翁伏臘如相慶天上星辰不可攀人間草木猶  
知敬二公事業在天壤道濟時艱不辭寬吁嗟乎熙甯國事  
兆靖康孰若南豐際明聖清涼山色常裒延惟德有鄰妙合  
併佳日尋芳遣歲時幽情思古由天性餘勇可賈躋翠微足

詩賡

七

底山川莽回橫東風亭外草痕薰積翠山中澗泉迸澄心樓  
閣已灰飛前代興亾後人鏡吾輩讀書幸太平跌宕詞場兼  
酒政青山滿眼意忘疲素髮垂肩氣猶勁放筆聊爲漫叟吟  
舉杯再下將軍令

同作

儀徵 劉壽曾 恭甫

愁霖十日鶯燕病冶城拋卻花事盛坐窗勘書不知春已  
見綠陰簾箔映先生呼我城西游清涼山翠南屏競四山  
環抱一拂祠巖壑清風想篇詠監門觥觥烈丈夫歲寒氣  
得松柏正朱雲汲黯嗟已遙卓哉節義公能更經局檢討  
安可羈汀洲編管豈非命半山文雅侍從良頗惜得君執  
國柄友生未擬君父恩遭逢苦羨明良慶閒從閩客搜遺  
聞謂閩縣陳幼蓮比部宗謙更見溪毛行潦敬載訪山南丞相祠竹樹

蔣森宇幽篁緬維湘鄉盛遭際

咸豐天子文思聖侃侃議禮鋪丹墀千載血誠與公併十  
年秉鉞龕東南大展生平忠孝性若教老作京朝官亦祇  
成就文章橫人代茫茫感出處偶然評泊談鋒迤碧桃花  
下呼行厨池柳垂黃蘗漪鏡觴酌縱橫禮數寬小戶蹄涔  
驚酒政酒酣更陟清涼巔翠微亭外東風勁歸來山館和  
新詩一笑蔬盤禁烟令

西巖雜詠 八首錄四

翠微亭 近屯新營

西風捲盡紅羅幃突兀孤亭竹樹荒妙墨英詞何處覓極天  
鼓角送斜陽

魯公祠

詩勝

十三

魯公祠宇柏森森門外寒潭照素心此是昔年魚樂國妙蓮  
現法到如今

四松庵

四松久已化龍去稚柳夭桃徧水潯解得昔賢培土法寸莖  
端許到千尋 庵鄰會文正公祠

碧琅玕館 在楷陰書院

先生雅具松筠操弟子都成玉筍班酒興乍闌詩夢破天風  
吹動碧琅玕

題甘建侯大令 元煥 江上春歸圖

侍養清淮閱歲年烽烟何幸淨吳天帆檣曉渡風初利梅柳  
春回月正圓六代煙雲山撲翠九秋臺榭桂連蜷 宅中老桂猶存 又  
看奉母門湖去 宿遷古稱門湖 官舫乘流望若仙

醉後放歌次愚園主人韻

寒雲匝地松聲吼，召客新開缸面酒。客到園林換霽色，年光  
已是消寒九。光明身到水晶域，愚園風景水石居尤勝水石相羊閒坐  
久。香爐茗盃寂，論心筆格詩筒寒。袖手眾寶襍，杳座中集酒  
聖詩豪。互相偶，老態龍鍾懷寒色。沃以松醪如抖擻，少年落  
魄江湖走。晚歲蒙戎，籬被肘江山俯仰百憂集。漸覺閒情澹  
花柳，閉門只許談風月。猶有飛鸞挂人口，旁人詫說喜吟詠。  
那有秋雲飛隴首，一夕高歌動鬼神。百年史上知誰某，愚園  
主人笑曰否。有酒且須酌，以斗白日黃雞。付逝波劉伶阮藉  
真吾友，山林面目我自知。冰雪襟懷君自有，蓋世功名黍一  
炊。山谷奚取湔湔圖不朽，酒酣更酌大笑樂。君快先登我其  
後。

詩賡

十四

已卯閏上巳秦淮展禊作

青溪流湯湯，滙作秦淮淥。重三阻風雨，曲室苦拳局。春陽幸  
逢閏晴川，麗朝旭遂作連轡游。同紆望遠目，山陰事已遙。觴  
詠繼遐躅，江山忘戰伐。花柳獻芳禱，萬物欣向榮。康濟未云  
足，驕余抱微尚。出處滋殆辱，舊學慚粗疏。幽衷病拘束，撫景  
復懷賢。沈冥付醺醖。

同作

全椒 薛時雨 慰農

東皇也自惜韶華，九十風光百二加。雅集另翻修禊帖，衰  
顏慙對殿春花。朱樓畫閣新圖稿，白板青帘舊酒家。座有  
裴張能隸事，清談未竟夕陽斜。

觴詠風流逸，少開山陰無。此好樓臺鈎募金，粉皆唼料驅。  
遣鶯花是妙才，扇影有人并蝶過。簫聲何處度船來，頻年

不作興亡恨每到秦淮但舉杯

禊飲曾傳極盛時後今今昔總堪悲豪華虎阜聲交社旂  
旄紅橋唱和詩壇玷冠裳須有主江山風月本無私吾儕  
格調參郊島只合扁舟載酒頤

浮生三見閨重三鞍背船唇味各詣往蹟如烟尋夢裏新  
詞多麗補江南白頭都講無拘束青史名流慣醉酣更有  
餞春消夏約好留輕棹極幽探

同作

上元 孫文川 澄之

芳韶最好重三日難得重三值閨年展禊來過邀笛步騁  
懷猶是賞花天笙歌未許淆清詠裙屐真堪繼昔賢轉恐  
蘭亭無此樂同舟瀟灑似登仙

已惜重三阻陰雨今晨風日喜晴和青溪潮漲浮詩舫碧

詩廉

五

柳陰濃拂酒波天使鶯花留旖旎人將觴詠補蹉跎須知  
此會非常有屈指平生幾度過

同作

上元 秦際唐 伯虞

紅橋如畫綠波平仙侶同舟續舊盟劫後山川無恙在閒  
中花柳可憐生人將妙墨追遺蹟天爲清遊放嫩晴卻喜  
隔簾歌一曲偶停雙槳聽鶯聲

愚園鹿柴中失牝鹿沈幼丹督部以煦園牝鹿補之陳  
工部幼蓮曰是嫁鹿也同人賦嫁鹿詞賸之

銜花倚樹托平泉又結西園松石緣爲想鹿門偕隱處劉綱  
夫婦本神僊

溪山大似輞川莊返照深林好鹿場一帶裙腰芳草色春來  
染作嫁衣裳

名園結構西山曲鹿柴高低往來熟伴宿青崖夢亦酣東風  
吹展芭蕉綠

雙雙覓食蒼蒼篔簹徑日日嬉春松檜叢只有池南未眠鶴一聲

清淚月明中

池有獨鶴不與他鶴爲伍

本無東海騎鯨想漫說西湖放鶴風日向冷城山下住前身  
或是鹿裘翁

古意四首用范月槎觀察歲暮感懷韻

佳入空谷首飛蓬天末音塵斷鴈鴻中酒光陰貪綠蟻落花  
心事戀青蟲不離藥曰偏工病但守綦巾未是窮庭樹無言  
春寂寂金經一卷悟真空

小時記作

帝京游江國俄成十載留浪迹幾時辭下里故鄉終日望并

詩賡

十六

州半千名士曾通訊十二高樓易感秋日暮涼風憑水檻情  
懷泛泛似沙鷗

暗將前事溯銀鐙紅燭華筵跋扈曾息影多年支瘦骨昇仙  
無力慕飛肱錦心機上愁添緒玉唾壺中凍有稜鈎起湘簾  
閒眺遠寒雲落木見荒塍

容易年華錦瑟過何從情事託微波風前絳蠟心灰早雨後  
紅梨淚點多篋疊新詩拚棄擲塵封繡鐵怕揩磨霜華已上  
麻姑髻羞向人前弄黛螺

又四首

屋角牽蘿徑剪蓬倚闌日日送飛鴻閒調箏柱排銀雁細對  
燈花剔玉蟲孤覓難邀知己賞嬋娟亦坐著書窮稜稜仙骨  
知何似天半蛾眉淡掃空

三吳風月記花游楊廉夫有好夢如雲不再留木末有時吟

楚澤柳枝無復按隨州陰成綠葉人何處瘦比黃花怨帶秋

家在西津烟水曲難忘舊侶是汀鷗

昨夜東風已試燈閉關人海踏何曾爐温丹火微調息榻有

青琴倦倚肱暑借殘書消眼福不教舊恨上睂稜西湖行樂

猶前日夢裏看花到馬塍

妝閣西邊一雁過銀河清淺月生波題詩落葉溝中斷入拍

秋聲塞上多天際歸帆勞遠憶街頭破鏡望重磨山樓無限

懷人意靜對烟巒翠染螺

### 憶近游八首仍用前韻

負笈東行鬢尚蓬游蹤歷歷記飛鴻釣臺春暖呼花鴨長蕩湖漁

家最詩塚秋深聽草蟲城外有戴童冠能偕曾詠樂時從先兄笠農

### 詩贖

七

師應童子試清狂未識阮途窮小山桂樹留人處寓舍于宅桂華極盛豪思

如雲藹碧空金沙

紅橋明月湖前游湖上尋春步步留但解烟花愛南國那知

涕淚濺西州時三伯父橋寓維揚未久下世池塘芳草迷寒綠城郭垂楊

帶暮秋五十年來鬢髮改湖邊難覓舊盟鷗揚州

湖雲黯黯見漁燈衰柳荒祠識路曾臺上殘碑訪淮海路過秦郵

游臺舟中大被效姜肱時與先兄次梅同舟春風草色侵衣袂夜雨河

聲到枕稜記訪仙宮過橋去斗姥宮在積水中以橋通之朱欄碧樹罨芳

塍清淮

十載吳閭買櫂過雙雙畫槳剪晴波梅花妓館開樽早木葉

僧樓落墨多書客攜囊尋跡至酒魔列陣積年磨難忘烟雨

橫塘路曉閣家家鬪畫螺長洲

烽火西來冒勃蓬，泖湖託迹等棲鴻。中宵攪夢驚風鶴，清夜  
流哀類露蟲。散髮長林初學隱，蓋頭傾厦不知窮。買田擬向  
西岑老，忽又浮雲過太空。西岑 在青浦縣西

浙水歸來擬息游，清汾魚蟹儘勾留。地有泖湖青鞋布襪淹蘆漈

古木荒村詠柳州，地主圖書共晨夕。野人蔬果足春秋，陳蕃

已逝無懸榻。主人陳駢生，相待甚厚。萍水前蹤問宿鷗。蘆墟 在吳江縣東

桃花潭上讀書鐙，風雨衡門寄跡曾。漁子湖邊來跣足，牧兒

隴上解麾肱。雨香蒼冷餘苔跡，水繪園荒賸石棱。一別東皋

多歲月，暮雲春樹隔千塍。如皋

脫險吳淞一葦過，魚灣安穩泛晴波。石港 名魚灣胸中塊磊澆除

易市上魚鹽，逐販多乞食窮途。簫屢換，攤書破屋墨經磨。冶

城重憶生平，事不惜溪藤染子螺。石港 在通州場

詩賡 愚園三十二詠 錄十六首 十六

愚湖 春暉堂

因湖乃置園，沕穆得愚義。私淑柳州八愚，有其二。

拾橡助盤餐，空山冰雪夜。天回黍谷春，佳境逾甘蔗。

無隱精舍

妙契無言旨，延秋八月天。我慙根性鈍，不解木樨禪。

清遠堂

開軒風露晨，倚檻烟霞晚。九老集斯堂，香山知未遠。今年正月九日

老之會同 集斯堂

秋水蒹葭之館

日落艤輕舟，一水平如掌。清風來故人，成不作蒹葭想。

日

成 不作蒹葭想



竹塢

築塢陂塘側，篔簹萬箇鮮。主人來獨坐，只說此君賢。

水石居

翠壁明朝日，晴波漾碧空。苔溪縈昔夢，人到水晶宮。

春睡軒

香露盈階瀉，晴雲覆戶低。海棠猶未醒，莫使曉鶯啼。

青山伴讀樓

書聲出林樾，山翠襲衣襟。靜結苔岑契，寥寥太古心。

集韻軒

少小弄柔翰，晚知覆瓿羞。主人邀集韻，授簡意先愁。

小滄浪

吳下嬉春日，滄浪跡未荒。此中銷永夏，清夢繞盤閨。

詩膽

十九

依琴拜石之軒

心醉七絃琴，手撫六朝石。榴間外史書，蜿蜿龍蛇跡。額集筴江上書

秋實老圃

築圃西園西，垂垂綴嘉實。佳兒讓寸梨，老母羞甘橘。

在水一方

花開四壁香，水動方亭活。此間有幽人，扇蒲而襟葛。

板橋

曲曲湖邊汜，迢迢溪上釣。霜天人跡稀，煙中拳一鶴。一名渡鶴橋

棲雲閣

之子崇堂構，營成安樂窩。長風吹不盡，閣外白雲多。閣中設尊甫

贈公遺像

胡氏愚園在金陵鳳臺寺側倚山為園水木明瑟初定為

三十二景後復定爲三十六景亭軒池館命名屢易拙著  
已刻有十六詠此外勝迹如分蔭軒松顏館牧亭巖窩嘯  
臺覓句廊養俟山莊鹿坪延青閣課耕草堂梅峴界花橋  
等處不可悉舉主人素以詩名成五古三十六詠其松顏  
館云今世交道衰青松落顏色我讀浩然詩中懷常惻惻  
築室爲座銘松顏名其額所希竹馬交切偃至頭白牧亭  
云不才無所用所牧惟牛羊平生差自許豢養諳其方提  
挈得要領行止頗調良是宜順物性不在鞭筆長嘯臺云  
山巔矗層臺遠峯羅滿目巍然見孝陵濯濯無寸木弔古  
生悲風興衰如轉轂登臨發長嘯不效嗣宗哭鹿坪云賦  
性本疏野所樂在林泉一朝圍以砦毋乃違其天譬彼高  
蹈人竟爲組綬牽僕僕牛馬走何時始息肩寓意深遠詞

詩贖

二

句雄拔非余所能幾及埒刊一二俾嗜者嘗鼎一臠焉今  
悔道人並記

題羅少嘒太守藏黃忠端公京江贈別詩畫冊用冊中

楊子恂太史

仲愈

韻崇楨辛未忠端往湖湘取道京

贈別孝廉名杖  
浙江嘉善人

送客南徐畫艦開湖湘前去路千回同心定掣臨歧淚搔首

長思擊楫才暮色蒼涼京口笛寒煙蕭瑟麗春臺臺在陽彭山爲六朝

送客之所一樽爲酌滄江月應有忠魂入夢來

題戴笠樵上舍笠樵圖

樵子忒辛苦抱書常掩關書城小于笠檻外卽青山余亦愛

巖岫白雲猶未還重吟舊題句悵惜髣毛斑前在崇川笠樵素余題句今二

十餘  
年矣

謁周紀善祠

紀善名是脩

表忠祠已淪塵劫紀善祠猶坳壁宮為痛僉都程巽隱竟無  
麥飯祀孤忠巽隱名本立崇德人與紀善同死金川之難益  
善祠重修而巽隱未經封祀國朝易為上元江甯縣學今紀  
江甯縣志亦未載入人物表為詩記之

聚寶山訪宋遺陵

落月枝頭聞杜宇寒煙草際見蒿燈行人夜出長干道誰識

江南有穆陵明洪武二年詔葬宋理宗顛骨於聚寶山

題王句生先生翼鳳舍是集

邗水王夫子文章節義兼浙中承攬瓊江上阻行幘君擬赴燕就萬  
藉船侍郎學幕余以道路多梗止之氣本青霞貫忠教碧血淹君以庚申浙省  
遺詩再三復老淚漬牙籤失守罵賊而死

題宋劉季高題名拓本

愚園六朝石之一

詩賡

三

書家北海源流在筆法于湖授受親我初得見題名字猶是

廬山面目真

鶴銘已泐蘭亭損波磔微茫不可尋石為搨手剝損但使孫陽工相

馬縱然駿骨亦千金

陳文甫同年煥新看山草堂集中有秦淮燈船詞和之

詩云旅食飄搖閱歲華眼中風景忽寥寥  
審可知一夕燈船費破盡中人產十家

舊事滄桑話白門秦淮猶有未招魂如逢五月湘江上簫鼓

聲中弔屈原上元夏教諭慶保死事於此贈都察院都事

夏君合葬儀徵人同時死節者有歐陽教授晉宜與人與

紅板青旗春事早畫船銀燭夜歸遲老夫學得觀空法此是

如泡似夢時

冶城秋日用莘農舟次新河詩韻

荒城日落數棲鴉策策西風帽影斜避客多時逃白社捲簾  
一笑見黃花殘書在几唸秋水濁酒盈杯醉落霞霜髮滿頭  
歸未得江山好處卽吾家

爲錢晉甫上舍

康榮

題劉文定公奉和

御製詩摺墨跡

摺因更繕未  
進故存錢氏

鄧治開

皇極儒臣詠在阿川原勤考牧晴雨問宜禾

見冊中奉和  
御製各詩

賜炬光榮盛

文定有金  
蓮賜炬歌

從繩啓沃多

文定著繩  
庵內外集

締交承相裔

劉開生太  
守翰清

流涕述

恩波

喜雪

十旬嗟早虐雨雪夜凄其始信羣生福能邀上帝慈藜羹來

詩賸

三

歲飽麥隴一朝滋定入疆臣奏

深宮喜可知

爲李東原司馬題金陵段文波花卉冊十二首

錄六

題桃花月季

一枝濃豔明潭水四季芬芳出綺叢常對詩人簾幙底年年

月月笑春風

題紅白杜鵑

盈盈珠閣清於雪嫋嫋湘簾綺若霞萬事不如歸去好客窗

清味杜鵑花

題白海棠鳳仙

淡烟疎樹詩人宅活色幽香處士家月夜斷腸清有淚秋階

羨煞鳳兒花

題荷花紅蓼

亭亭浦澈紅稠渺渺湖波碧  
縹風來葉上先秋我比蓼花還瘦

題雞冠花萬壽菊

菊圃風來竟日西山齋寂寞伴雞栖  
簾前一丈紅如許曉色庭階不肯啼

題山茶水仙

深深綺纈花如繡渺渺冰心玉有香  
莫說詩家愛平淡齋頭紅白逗春光

同人登翠微亭抵暮飲四松庵卽用四松園看菊食字

韻

暫從巖壑脫朝蓂物外清遊我最貪  
落木樓臺倚天半夕陽

詩贖

三三

城郭見山三秋高莫負金樽醉興逸  
羣飛玉屑談欲問蒼松舊時值碧崖無際帶晴嵐

偶述用前韻

秋風破帽不勝蓂唾手功名莫浪貪

近得西師捷音

不材樗櫟甘巖

堯舜宮中明作兩龍驤境上捷成三  
隱末學丹鉛亦甕談第一江山歸不得  
何時蠟屐破雲嵐

月槎觀察四叠食字韻口占奉報仍用前韻

蕭蕭霜雪已盈簪閉戶猶將子墨貪  
十事迤邐常八九一年

歡譁記重三

今年春作秦淮展襖同遊最樂

石交差幸聯詩社里乘還思繼

筆談

宋沈括著夢溪筆談夢溪在丹徒運河之南

終日冶城山下住晴窗寂寂對

烟嵐

茶具八詠

茶筴

一串新茶帶露鮮，濃傾入筴結彌堅。梅蘭刻畫刀痕化，龍鳳同旋鏡樣圓。繙譜略同潘氏墨，解囊酷類阮郎錢。平生筆硯都焚卻，不落人間雪爪緣。

茶磨

一編茶譜守君謨，磨出雲芽供御厨。宋仁宗朝有御茶廚架上霏微如屑木，盤中歷落細翻珠。蘇詩蒙茸出磨細珠落略同瑞麥登場早，不比新杭入碾粗。笑我年年踏陳迹，且傾苦茗作醍醐。蘇詩團團如磨牛步

陳迹

茶籠

采采傾筐碧可憐，湘籠宿火夜猶然。山中式仿爐編竹，竈上香如稻熟蓮。淡泊略攪燒筍味，寒溫剛近煮蘭天。誰家少婦

詩贖

三四

金缸側繡闌，香薰未息烟。

茶簾

茶網幾日到東吳，江上連舟柁載麤。箬裏為防春漏洩，紙糊常護色芳腴。千條細截淇園竹，九節休栽董澤蒲。寄語浮梁未歸客，關津慎莫溷官租。

茶銚

汲取雲腴手自煎，松風入耳趣陶然。氤氳未斷爐中火，挹注全憑竹裏泉。篆刻家家摹晏老。陳氏易生石交落落湖坡仙，何時攜銚秋江上一棹，中冷水拍天。

茶甌

青甌几上日摩挲，一盞清涼遣睡魔。潑瀋能消胸有壘，舉杯常助口懸河。書叢位置鄰泓穎，瓷色新陳辨汝哥。自笑詩腸

太艱澁生平辜負飲茶多

茶舟

泛泛松蘿入手香  
米家書舫足徜徉  
江樓纔送千帆影  
茗碗旋憑一葉將  
斟酌有時延曉潒  
拍浮隨意到斜陽  
嘉名若補吳船錄  
領取陂塘五月涼

茶竈

墻陰添得黃泥竈  
爲煑新茶待客來  
濕葦時時愁苦雨  
蘇苦雨詩  
破竈燒中庭  
灑灑響輕雷  
瓶肩敲凍三冬老  
甌面凝塵一夕

開更喜江東杭稻賤  
春缸且潑臘前醅

秦淮訪秋詞 記丁丑年事

清溪雨後碧粼粼  
寥寂江山粉本新  
白髮青衫黃篋秦淮  
合有訪秋人

詩廣

三五

一年花事或匆匆  
三五騷人興倍濃  
底事秋江怨風露  
寒香開到木芙蓉

西風吹瘦綠楊枝  
剩有漁家弄釣絲  
流水空山春信杳  
壯生蝴蝶夢醒時

懷忠親薦侍中祠  
薄采蘋花夕照時  
照見坊間忠孝字  
秋波明似碧琉璃

不插塵紅卽是仙  
白鷗片席早涼天  
船從惜字林邊過  
暫結蒲團半晌緣  
河浴有古惜字卷

倦指老眼酒初醒  
雲影天光展畫屏  
洗盡南朝金粉氣  
鍾山一倍向人青

長板橋頭艤棹遲  
夕陽古渡漾漣漪  
行人猶愛吟桃葉  
不記新亭雪涕時

苦海端憑我佛超香烟鏡奩集中宵梵燈在水清於晝流過  
蓮花第五橋

韓叔起比部

弼元

招集寓廬賞蘭蘭始遭雪凍春透復

吐奇豔主人先後各紀以詩屬和

江南乃人海風勢揚蓬勃卓有高賢廬幽香靜中發記昔訂  
交初家門及京闕清晝門旗槍寒宵煨骨柎各具冰雪懷堅  
凝松柏骨論心比椒桂樂飢守薇蕨君官辭白雲我廬甫黔  
突歲已已余握手金陵城言絲意不竭來乘廣陵潮同看冶  
城月未幾君移舍城南拓十笏興寄楚晚蘭盆盜排凹凸燥  
濕問陰晴灌溉忌倉卒靈騷快吐芬膈合入毫髮昨遭積雪  
凍名葩傷汨沒痛此當門鋤功疎見泉掘天意回朝陽山窗  
播幽醇秀態益清新靈根無剪伐生香經妙手變轉在頃忽

詩廢

三六

前後紀新詩鋪几千言滑陶杜寓性真籍湜走僵蹶樽酒快  
招邀肴蒸辨嗟咄論交集素心日斜情未歇言徵瓊琚詞艾  
蕭雜堞堙荒詞遭吐棄殆類口中核

雪後集頤園遂登巢居閣以巢居二字爲韻寄題二首

閣額乃  
亂筆

雪到逢殘臘樓居覽近郊風光遲梅信人語出林梢曠野時  
招鶴空山想結茆靈旗來往熟春滿一枝巢

望裏東西冶神仙舊日居鶯花醒塵夢風雨掩吾廬興逸貪  
攜酒心空懶著書金丹如可乞咫尺接霞裾

余學署在冶城  
山乃明朝天宮  
舊址也

擬和

一年將臘盡春雪又東郊黯黯溪塘凍莎莎松竹梢衣單誰



解褐屋破待編茆滿眼哀鴻景棲流似窟巢

時南城外留養流民

何曾仙藉與棲息愛樓居門對陶潛柳松明梅尉廬心光須

洞我手澤是藏書閣為梅氏藏書地淨地招吾侶雲中接佩裾

西湖舊有巢居閣凡仙以頤園風景相似題曰巢居余草

草成詠未敢乞和故代擬作云云未匝月仙降呂氏壇依

韻和之和巢字句云屋梁誰補漏春燕待歸巢萬和平温

厚之旨或以湖上閣久失修即景成句異日當令外孫元

壽三壽歸里時訪之今悔道人並記

春日隨外祖登巢居閣敬用前韻

外孫姚元壽伯元

暮春隨杖履結約往南郊近局探花信幽棲在市梢鶯聲

將四月雲氣結三茅草色西堂動神馳海上巢

舍弟漢庠叔怡隨

家君在海州讀書

詩賡

三七

山色謝公屐經聲揚子居看花忘世事乞藥叩仙廬

為內子乞

方燕到營新壘

甫自臨澤來治城

蠅癡戀故書秋風將試翻天外

望雲裾

將於七月返浙

為梅少庵州守壽

康庚午在罷

題其七世族祖耒長先生山水畫

於康熙庚午在罷泰和令前一年

沈寥秋氣入松杉峭絕山城倚碧岳七十行年更加六散衙

無事望歸帆

名人作縣異流輩佳詠修船繫去思

先生在泰和恤民役作修船謠

可惜羅

陽官閣裏不將殘墨補新詩

又題

阮亭竹垞懷前輩雪稻琴魚話故鄉

見樊榭送攝長先生返宣城詩

三兩雲

帆千尺壁羅陽秋色是行裝

天闕雲烟生几席手弄丹鉛頭雪白故鄉佳處存茅庵冷城  
亦有思歸客余署在冷城山

爲少庵題其九世族祖瞿山先生山水

白龍飛出峽潭水瀉冬春策杖者誰子知爲狎浪人

曩見瞿山先生黃山圖知有白龍潭又知白龍潭對面有  
狎浪閣茲寫黃山一角情景逼真益令余神往也

前題未盡松石之妙再賦一詩

絕壑深巖隱古寺山色蒼蒼鬱寒翠月明仙鶴倘飛來踐踏

青松似平地我耳黃山五十春道光辛卯在金陵有安嶽友人約遊黃山未果年年

羈鞅困風塵會當辦理兩苾屨軒帝臺前學採真

十一月二十五日李芋香提舉龔懷璞醴令德溥董臨

之少尉來余齋觀書畫少庵攜瞿山先生黃山圖至

詩賸

三八

同賞稱快留余齋中十日題絕句二首歸之用冊中

韻

嶺上南風暖精廬向日開多情梅尉至袖得白雲來

卅六峯巒妙雲屏面面開臥遊余意足何必入山來

月槎觀察招飲

婆娑江國幾華顛折柬相招倒玉船坐客勿嗤名似餅秋宵

端仗酒如泉談詩漫涉屠沽字祛俗還憑杜撰禪白日堂堂

如電過但憑杯勺遣餘年

正月二十四日同人集愚園作白香山生日

海上仙龕已返真三吳俎豆尙莘莘聖湖烟景歸賢守謂慰農山

長京尹風流有替人謂穎叔山長千載心香溯壬子一時手筆記

庚辰大裘我憶東陽沈燈火元宵最愴神沈文肅生日在八月初

梅孝子詩

孝子名纘高字卓庵江甯人到臂愈母疾以諸生保薦授山東恩縣洊升監司五十後致政歸家有甌園向爲作藤花長歌子壽康持行略來詩以紀美

母疾已大漸難爲孝子懷中宵侍牀蓐寸肉替刀圭疹退天爲覩春回淚暗揩聲名流頰壁交際及江淮花發河陽縣園成履道街兒孫綿世澤珠樹滿庭堦

宣州琴河篇

咸豐庚申粵寇由蘇及常熟上元梅少尹琦與夫人張氏居城中夫人勸少尹遠行爲少尹縫衣裳內置釵釵充行旅費少尹出門夫人赴水死少尹隻身避寇流離達關中被陝督楊宮保岳斌知遇爲上客未幾關中兵譁少尹殺賊死宮保爲請於

詩賡

三九

朝得

贈蔭江南大吏亦爲夫人請

旌節烈同日入祀金陵昭忠及節烈祠爲賦宣州琴河篇赤眉寇東吳砮礮聲如雷常熟彈丸邑城櫓將崩摧夫人在中閨寸步禮義賅結髮得良匹黻佩期永諧一朝聞賊至淚下如瓊瑰上堂語夫子百室將罹災賤妾習姆訓懦弱慚帚釵守身如守玉大節無敢乖爲君縫裳衣爲君結鞵鞬行路防篋袷匹夫慎璧懷夫子速遠行毋負戡亂才君去母念妾妾義百不回夫子出門去赴水無遲徊侍婢年未笄畢命清波皆相從不相違主僕依泉臺甯飼蛟與鰐不羣虎與豺城中鼎沸羹道上風揚霾行行辭江南一劍咸陽來宮保在咸

陽賓轂勤挽推堂上陳厚幣帳下無凡材此時魚得水軍贖  
皆手裁琴尊薦芳禱燈火居高齋壁壘雖云整餉缺遺禍胎  
刻傳軍士譁刀槩聲喧虺嚙齒誓殺賊恨少義士儕奮身諸  
軍中碧血埋草萊臺中白晝昏城上烏雲隕求尸無處所鬼  
哭聞悽哀踰月軍事定日曉潼關開宮保撫膺痛痛無指臂  
偕上章達

天子恩綽光門階關中望江南高節雙崔嵬婦孺侈姓氏事  
往名不衰夫人琴河張夫子宣州梅

贈包星南孝廉

少年文字喜崢嶸鳴鹿欣吹萃野笙清祕槐廳他日業韋經  
歐荻舊時情尋常未許題門鳳三十初如出谷鶯我亦曾經  
味冰蘖夜窗風雨一燈檠

孝廉時年三十

詩贖

題湯祿名畫錄甲寅吳門相見舊作

三

吳中落拓羽林兒破硯隨人作畫師十二古琴無處覓獨餘  
焦尾有誰知

忠愍有十二古琴書屋

歲暮詠物詩用月槎觀察詩韻四首錄二

維摩丈室習熏脩碧椀黃香潤欲流詩詠衛風投宿好酒來  
邗水助清游

揚州以木瓜爲酒

漫同淮橘踰千里略似溫柑熟九秋

更喜

王程通哈密

天珍星夜達殊郵

木瓜哈密瓜向於冬至前後入貢

亭亭素質托微波一葉曾經大海過燭影幢幢浮畫格冰絲  
簌簌動琴歌清泉白石銘心久紙閣蘆簾得氣多寫出癯仙  
好丰致霜毫在手不嫌呵

水仙

三月二日隨林穎叔方伯壽圖送沈文肅公栗主圻祀

清涼山一拂清忠祠祀鄭介夫先生紀事四首

一疏陳民瘼中原罷役徭清操足風厲新學已煙銷棟宇存  
祠廟春秋薦荔蕉閩賢今繼起勳業邁前朝

臺疆纔報政旌旆又江東德大消螟螣恩周轄雁鴻聲威重

譯播學行二希崇蔡開之先生著二希堂集太息騎鯨去

朝廷備飾終

痛灑西州淚鍾山有故人交情金石篤祀事藻萍陳曠代欽  
風烈同堂仰德鄰石城淹下吏爲賦送迎神

祠堂倚江郭佛地近清涼萬竹籠層靄三山帶夕陽幽棲富

泉石佳日集壺觴德望湘鄉並常留石室芳

省吾六弟於戊寅六月下世十月初一日夢中見之備

詩贖

三

詢夜臺情況並問見吾子遂禾否省弟曰見之余問

現在何處省弟曰在浙江琴臺作畫語甫畢卽醒爰

紀以詩

檢到塵編編淚欲濺西堂草色黯如煙雁行中斷已三月夢裏

今宵見阿連

爲言小阮離塵垢又向之江作畫師憐爾琴臺長寂寂冷風

疏雨寫相思

題次兒遂禾畫

湖陰秋靄

閒門寂靜暮烟橫一片湖陰畫不成落葉蕭蕭波瑟瑟是誰

池上聽秋聲

松亭觀瀑

巖前飛瀑覺寒慄。澗上青松寫塊奇。莫是尋涼向靈隱。冷泉亭上聽泉時。  
遂見自言何在浙西有人招游靈隱避暑匝月林谷山態夢寐不忘也

又題次兒遂禾臨金冬心畫冊

芭蕉冬心原題云綠得僧窗夢不成芭蕉偏傍矮牆生秋來葉上無情雨白了人頭是此聲

壞塔荒垣落木稠。芭蕉葉上不勝秋。果然學得無生法。聽雨何須到白頭。

枇杷冬心原題云賞徧桃花又李花千錢買酒不須賒阿誰拖着青藤杖來看僧樓野枇杷

東風吹盡李桃花。思子亭前日又斜。對客讎書都懶倦。荒齋五度喫枇杷。

題句附  
閩縣陳宗濂幼蓮

玉茗堂中歲月深。閒搜兒篋一霑襟。愛緣倏忽花辭樹。老鬢蒼涼鶴在陰。寒具尙留當日迹。金環定愴九原心。阿連

詩贖  
三

爲指琴臺路。夢醒鐙殘月滿林。

想見含毫布稿時。阿翁指點爲支頤。承家文筆仍多藝。生子聰明本不宜。今日禮堂親寫定。他年祖德重留貽。一門風雅成材廣。憑仗靈光久主持。

六朝松石歌爲胡煦齋太守作用漁洋山人詩韻

米游辛未陸丁丑題名親撫譙巖石。  
焦山有米溪堂陸放翁題字米游在元祐辛未

陸游在嘉熙丁丑江風送我返建康。探幽又著西園屐。木樨已謝鞠

有華。嘉賓連袂笑談劇。蘭綺昔爲勳臣第。草堂今是愚公宅。

可惜長松已蛻化。拏雲無復蒼髯戟。巖閒歷歷紹興字。閱年

七百莓苔積。主人搜剔等瓊寶。如向波斯獲珠珀。靈奇不受

敕。三品高潔有逾雪。千尺千尺雪峯名瓊華。良嶽已飛灰。托根山

澤。辭兵厄。高孝朝廷疆宇靖。名士山林那煎迫。脫巾徘徊巖

石旁登高撥墨供揮斥  
涑水白巖跡已往當日朝綱賴畫壁  
季高想亦欽奇人楮墨風流傳在昔  
茲園幸歸安定齋築室  
娛親樂朝夕花木常留金谷春  
詩詞待鏤玉山集只我官閒  
來看竹酒染衣衫墨沾幘

展七夕秦淮小泛用吳莘農燕子磯守風韻

晚喚秦淮舫秋風拂釣磯  
三篙分碧浪一篷送斜暉  
瓜脯登筵屢篷籠帶月歸  
孤鴻響天末中澤賦無衣

再賦一首

又從水次滌煩襟木葉蕭蕭聲在林  
落日尚懸查客信秋風偏動散關心  
時臺灣尙未撤防但憑蠲酌消長夜  
况復鴻飛聞遠音  
屈指桂華期尙早瓊樓高處已寒侵

秋晚獨游清涼山

詩贖

三三

不淺登臨興看山帶夕陽  
溪光明似鏡木葉飽經霜  
野艇呼魚賣僧厨乞酒嘗  
一般清寂意打疊入詩囊

吳祁甫孝廉

承志

屬題黃巖王彥威母夫人焦尾集

水肌一寸代針圭弱女精誠貫白霓  
識得詩人忠孝旨漫將

風月付緘題

夫人在家判臂療親疾

亂後家山入詠哦山中竹樹長新柯  
不須身世憐焦尾官職

聲名水部多

彥威官工部

編詩不讓著書功正氣多歸閨集中  
劫火銷沈無一字可憐

殘葉付飄風

夫人輯閨中正氣集亂後全佚

丸熊墨荻母兼師七十年來涕淚滋  
江上書帷霜月苦傷心

我亦少孤兒

孝烈夫人辭爲秦大令

際唐

母夫人作

夫人何氏在家刲臂療父疾適秦氏文林君早卒撫孤守節遘粵匪之難赴水死

親疾瀕危剗肉代醫赭寇熏天捨身入淵節行嵬峩母儀靡他才藻續紛令子善文脩脩羽翰毀巢復完子表母名淚與涕并陳辭

九閩

帝有恩言曰孝曰烈令聞不滅

題舊藏吳江明周忠毅公擊魏奄疏稿二首

一疏清宮禁何虞國瘼狂直令礪腐魄端欲挽頽綱下筆詞成鏗傷心血裏瘡曾聞授命日靈爽駕歸航吳中相傳公在獄家中未知存亡一日公攜舟子入門命家人給舟子錢公入後堂遂不見後知是日即公授命日也植節東林外沈寃北寺中遺文悲賦鵬公雜著手跡與各劇疏稿同裝成卷

詩賡

三五

跡妙飛鴻謫尉英靈共謂楊忠愍公焦山有忠愍手跡名僧守護工由方伯公鈐江甯承宣布政司何年獅嶺畔高閣起雙忠印送藏焦山永鎮山門

送周忠毅公墨迹藏焦山定慧寺記附

道光辛卯彥修年二十登焦山憩仰止軒拜觀楊忠愍公手迹肅然敬悚攜拓本以歸後游京師同人集松筠菴摩挲忠愍諫草石刻益心慕焉自是愛收明季忠節諸賢遺墨丁未司諭蘇州之吳江為明周忠毅公故里上事後謁周恭肅祠祠為忠毅手建即今卷中敘列恭肅遺事求人作記者也忠毅有坊在城中華亭董宗伯其昌題曰首忠又一坊在吳江境上運河西岸吳江令熊開元魚山建坊石多傾墜與忠毅後裔祖白平珊二君居盛澤謀修葺未果初忠毅居城中大雅堂嘉道間猶藏有畫象及獄中家書曾



由楊漱芸大令屬爲題字訪求忠毅已未刻奏疏卒不可  
得一日在市攤上買器物有大雅堂後人以舊紙一卷求  
售如價與之歸視乃周氏田房廢券內有忠毅擊奸手疏  
及自著雜文手稿珍藏如球璧咸豐庚申吳江被粵寇彥  
脩攜家渡海書畫什物隨手棄惟忠毅手迹扁之蓋篋行  
輒與俱同治甲寅爲母太恭人遷葬重至吳江祖白平  
珊先後死城中荒榛被路大雅堂已燬益歎忠毅手迹之  
存於世者爲可幸也今年長夏無事檢視舊藏命工分裝  
二卷乞當代名公題跋送歸焦山以完生平未了之願四  
明盧公弼曰公少時聞大父譚楊忠愍事曰楊公之死乃  
不死耳彼嵩鸞安在哉公之大節果後先與忠愍一轍彥  
修今日以忠毅手迹藏之名山與忠愍卷同垂不朽當亦  
忠毅所隱爲許可者已光緒五年歲次己卯仲春月丹徒  
趙彥修記

詩贖

三五

己卯春乞假赴蘇路過京口用胡子繼親家培系返續  
溪詩韻並寄六濤上人

一舸橫江至南山展畫屏石帆吹不落岸草燒猶青夢繞崗

頭樹

西山丙舍  
尚未成

潮生渡口亭是誰三弄笛淒惋月中聽

萍飄何所寄白髮向人間不盡樽中酒難忘江上山濟時才  
早退懷古淚猶潛行策金陵蹇輸他鷗鷺閑

晤舍弟君舉卽贈仍用前韻

味似菅騰酒身如屈曲屏茅堂欣聚首相對一鐙青事業歸  
文字風波閱埃亭傷神連夜雨哀韻不堪聽時省吾又宜  
兩弟新歿

早歲耽經術游心孔鄭間幕偏淹上客業未就名山歲月逝

如此風塵涕欲潛勸君勤料理莫負雪窗閑

命兒樹禾齋周忠毅卷敬藏焦山并乞六澗上人作名  
山弄墨圖卽送之入都仍用前韻

曉喚石公渡名山列翠屏精忠壓濤浪妙繪待丹青光燭獅  
巖月名齋鶴碣亭夜深如諷讀定有水龍聽

長安居不易托盃又人間舊侶辭京輦癡情戀故山策名時  
及早憶弟淚休潛努力登

王路毋耽十畝閑

自錫山早發日暮抵蘇住姚復安親家  
家滄小有園居

並贈仍用前韻

霧斂波如鏡雲深樹似屏落花三月暮山色九龍青鐘韻來  
禪寺茶香問客亭漁歌起前浦一曲醉中聽

詩贖

三五

吏隱在城市悠然松石間客稀門有雀園小靜於山研削情  
偏戀蟾蜍滴不潛如何醫國手坐令使君閑

江上雨泊

焦仙洞口濕雲積石公山下夕風柔江天漠漠收篷早一抹  
炊烟罨舵樓

攜外孫元壽三壽登焦山枕江閣

傑閣臨江起江光面面來崩崖銷劫火大壑轉晴雷不盡登  
高興端思作檝才白頭重覽古懷抱暫時開

題董臨之敬輿藏倪雲林疏林遠岫圖爲性海上人

作

平生愛讀倪迂畫運筆精微接右丞收取九龍山清寂意故

應寄與竹鑪僧王孟端曾爲性海上人製竹鑪卷子

清閼聲名自終古江村書畫已無存披圖記訪玲瓏館猶帶揚州煙月痕

曾藏江村高氏半桂馬氏

元鼎 山陽留別贈行諸什

客未送春春送客新詩爭詠陸山陽贈錢贈策情無限不及瑤華滿錦囊

虛堂洞燭然犀澈四野巡行樂雉馴自笑江郎才筆退爲君

重賦秣陵春

君新蒞江甯縣任

紀夢

托盜明湖烟水濱夢中藺若記來眞石牀茶竈清無暑我是昭通寺裏人

九月九日范月槎觀察約遊半山寺未赴遲日以詩謝

之

詩賡

三七

淮水東邊棹客舟幾人山寺散清愁元豐往事浮雲過白下諸峯落木秋斜日墩前人折屐

是日游侶中間有折屐齒者

西風席上菊

盈頭白慚腰腳今衰懶只合濡毫紀勝游

爲李東原司馬泰封

題几谷上人掃葉圖

上人初住京口九華山後

住焦巖之海雲庵

九華老僧頭半白瓶單晚寄焦仙宅西風脫木畫中秋落日寒鴉江上夕我別獅巖三十春寬鞵瘦策記前塵會須築室

譙東麓長作山中掃葉人

詠金陵古跡十六首

臺城

嶺樹烟霞色湖波日夕聲暮鐘殘照裏一抹是臺城

王穀原詩暮鐘

殘照戀臺城

雞鳴埭

十萬貔貅隊三千粉黛叢雞鳴塵市換舊事已東風

和作

丹徒李慎傳子蕚

六飛去何之湖光照人冷埭外雞始鳴繁華夢已醒

邀笛步

爲君三弄笛落落訂知心但得箇中趣常餘空外音

雨花臺

法會啟無遮山河付刹那蕭公會悟否非雨亦非花

翠微亭

撮襟書最妙亭子倚斜暉昨夜東風起家山憶翠微

半山寺

驢背看鍾山詩懷故奇崛我愛鄭監門荒祠尋一拂

詩賡

三八

靈谷寺

落葉樵人徑空林釋子家晴游鍾阜鹿寒帶孝陵鴉

莫愁湖

花草千年歇棋枰一局休我來湖上住烟柳迴含愁

秦淮

曼曲停箏舫清謳起笛家燈光兼月色桂子與荷花

和作

慎傳

蘭漿接朱閣華燈沸綠波誰知石城外獨占月明多

商城楊鐸石卿

武定橋邊水涼篷船上家妾身如柳絮郎貌似荷花

燕子磯

怪石鬱嵯峨驚濤奔迴旋去落日眺金川莫是飛來燕

和作

鐸

孤亭鳥外懸，坐看江流旋。山色曉空濛，雨中飛石燕。

元武湖

魚已豐年兆，翻愁彈鋏無。只因湖上吏，日日權魚租。湖有魚稅，太平前一日須往太平門買魚，籌放客至，每不得食。

隱仙庵

寥寥泉石荒，落落琴樽渺。山中人，不來相思寄雲鳥。庵為昔賢觴詠之地，住持樸山道人詩嘗寫所作山中雜詠二首寄先大夫，有云倚樹鳥親人，入山雲讓我名句也。

木末亭

已失長干塔，還新木末亭。春風吹客到，無事訂茶經。亭舊有茶社。

臥佛寺

津梁苦行役，晚歲愛林陬。飯罷逢僧話，斜陽臥佛樓。

詩贖

三九

和作

慎傳

役役苦塵勞，息機到初地。山鳥悄無聲，恐驚臥佛睡。

隨園

羣玉峯都毀，雙隄路已蕪。荒榛斷行迹，落月竄妖狐。

冶城

木脫初黃葉，樓憑最上層。冶山風雨夜，猶有讀書燈。

和作

慎傳

先生治城居，青氈樂無悶。風雪載酒天，奇字倘容問。

清晨學書用惜抱軒集寫經詩韻

學書誠小技，貪嗜忘塵事。當其微妙處，人力未可至。河南三龕碑，魯公千佛寺。少年心氣盛，冥追劃寒被。中歲苦作輟，博涉聊興寄。復困院體書，猿鶴受羈累。今晨滌書室，檐外樹交

翠且親陶穎樂那究晉唐義七十老無成終當屏文字

李一山大令

士龍

彙集漢魏六朝磚拓本令嗣芋香提

舉屬題

拓本有楊龍石何子貞翁叔均楊石脚庚康甫諸君題跋

累代陵園嗟茂草一隅塋埴抵兼金但憑陶旗傳文字不負才人愛古心

猿叟龍翁金石友早年子墨共因緣小松硯譜秋堂額塵積

巾箱三十年

余所藏小松硯譜龍石所贈余秋根書堂額猿叟書也

集古書叢劇辛苦

叔均纂金石考惜未刊行延秋詩筆縱清狂

生平愛我吳康甫更費名媛寫國香

康甫令愛女為余寫紈扇

營邱舊澤慎收藏更集璆琳補散亾展卷如逢今舊雨秋宵

翦燭共書堂

末幅乃芋香提舉所補輯

題一山大令梅花美人長卷

詩賸

四

楓葉吳江湖舊游墨痕醉染鷓鴣裘

余松陵畫友詩舊句謂一翁也

美人芳

草如絨恨塔影鐘聲易感秋

葉氏鐘聲塔影樓為吾輩鷓鴣詠之地

海岳風流歸

小米巾箱粉本重丹邱鐙前展拂梅花影萬樹寒香照白頭

題一山大令山水

山郭雲烟淨書堂竹石妍是誰卻簪黻消受此林泉

又

暮雲垂石壁歸雀噪林陬策杖荒原上秋光淡不收

又

寂寂深山裏蕭蕭落木天溪行未歸去相與話寒烟

又

茅舍依巖築雲山潑墨遙漫漫煙雨裏行客在溪橋

又

溪亭絕塵跡衰柳瘦於人沙瀨秋風急蘆中試問津

題一山大令畫梅

雙幹參天根穴石繁花雪積眾香國靜比幽檀播馥芬健與  
蒼松鬪標格一別逋仙今幾春楓江落月迷寒津琴囊酒榼  
猶前日讀書兼懷題畫人

畫有石卿大令跋

題一山大令魚藻圖

圖作金魚數十頭碧藻圓之極青蔥活潑之致

幾人魚袋朝天闕獨我金貂付酒罇不覺觀河驚面縐年年  
鄉思爲蓴鱸

最憶松陵張上舍養生端仗種魚經龍睛蝶翅曾充贄益藻

過於書帶青

吳江張生某讀書之暇以種魚爲生春初必選佳種以獻萍藻青青致可樂也

題一山大令及令弟挹仙貳尹

繼蟠橘隱圖

澄懷昔見黃叔度大筆今逢陳孔璋

令嗣芋香爲江商大吏佐章奏

詩贖

早

山證前迹經過二十一番霜

圖成於咸豐己未今庚辰重題閱二十一年矣

一雁橫空入暮天莫釐山色賸吟箋西堂春草今猶昔寫罷

新詩訊惠連

謂挹翁

湖濱七十二峯閣寂寂禪房雲物鮮酒椀茶鎗零落盡披圖

難忘看山年

笠澤之東七十二峯閣與俞少甫昆仲舊游地也

坐守青氈屢感秋淡烟疎樹冶山樓酒腸枯渴詩腸澁落月

吳門憶舊游

舊作

金庭玉柱傳自昔其中卉木多華腴松陵此去不百里苦

羈宦轍空嗟吁李君昆季賦幽癖合家移在壺公壺朝嵐

夕靄墮几榻涼雲清翠生竹梧弟兄各負經世望豈無慕

檄兼軍符商山暫作一日隱漁樵竟作仙人呼自從丹橘

登楚頌佳植往往傳東吳荆溪築亭願未遂君遇突過肩  
山蘇我家山水稱第一北望苦爲烟塵紆兵戈滿地歸未  
得行將一棹依東湖

東湖在青浦西  
岑鎮買宅甫定

### 題李一山大令袁江萍聚圖

慈姥宮前春寂寂韓王臺下水漣漣何當訪舊從袁浦一勺  
寒泉薦水仙

### 附記

余司教建康愛與聞見該博之士游秀水李芋香客兩江  
節使署過從稠洽屢同觴讌芋香爲故人一山大令之子  
一日命使齋巨軸至發之乃一山袁江萍聚圖也芋香復  
以書來曰嗣泌幼而失學中更憂患未湔過庭之訓先子  
與游諸父執多闕展覲先子精繪事僑寓袁江乃集袁江

### 詩贖

### 呈二

工畫者合先子爲九人作袁江萍聚圖圖成藏龔夔夔變卿  
所龔丈身歷兵燹守圖勿失龔丈沒哲嗣懷璞自淮陰來  
以圖歸嗣泌嗣泌捧圖而泣先子早年貌範愾乎若接視  
家中藏奉畫像爲逼真圖未有記諸父執年貌姓氏無可  
懸揣幸楊丈石卿需次金陵常相欵洽爰以圖呈石丈求  
爲之記石丈將履任震澤匆遽未及爲乃指示大畧謂嗣  
泌曰圖中過橋立於竹石間者常熟蔣蒞生仲籬也桐陰  
下行隨尊甫後而有鬚者長洲戈宙琦望槎也坐瓷墩目  
注眎若有思者婺源黃平格石舫也據石案開卷點筆者  
余商城楊鐸也太湖石旁微笑而立者嘉興朱熊夢泉也  
與夢泉並立而身稍後者歸安沈林筱雲也跌坐靜默初  
學參禪者嘉興何墀彤齋也倚石案品茶悠然若有會者



吳縣周康壽春谷也嗣泌誌之不敢忘今年重付裝池欲  
求有道能文者記之俾嗣泌珍弄以示後人吾丈先子舊  
交敢乞一言敘作圖始末先子實嘉賴焉予惟人生而有  
羣論文考藝友朋是賴其志趣術業相近則尤賴焉一旦  
風流衰歇感慨係之必載以丹青題詠則跡可久而傳益  
遠諸君蘊積深厚或學或仕立身具有本末模山水狀禽  
魚特涉筆及之一時攬環結佩若情景一失不可復追者  
則行誼之孚與性情之篤見焉余向在吳門與畫人相往  
還曾賦畫中九友歌用梅村祭酒詩韻繼爲松陵畫友詩  
一續再續並乞一山爲作寒齋論畫圖令子孫永守以爲  
世寶今展是圖圖中人或捧手論交或聞名不相識而停  
雲望遠之意不能無動於中泚筆記之復芋香卽以報一

詩賡

四三

山也光緒六年庚辰冬十月丹徒趙彥修梅叟記

恭甫送白荷花口占奉報

萬卷書堆青玉案一瓶水養白荷花秦淮河上採蓮女燈影  
釵光豔若霞

贈恭甫

江南號文藪三十已登壇幼學傳先業航詩念好官書林推  
領袖山閣此憑欄

聖代需材亟休貪容膝安

題范月槎觀察仕隱圖

吳市神仙尉華陽宰相堂先生富憂樂千載共行藏金箭搜  
材廣江淮被澤長經猷堪報

國不獨在文章

送林穎叔方伯還閩三首

方伯曾夢至吾鄉招隱寺因號黃鵠山人並以名集  
蕭梁帝子讀書處樹老泉香雲岫鮮載誦先生夢游什卽是  
京江耆舊篇

春日鶯聲到柑酒再來綽有晉賢風名山無分羈仙躅黃鵠  
高飛滄海東

城上巖巒獻晴媚園中蘭蕙吐華滋春風寥落西堂夢重展  
三山憶弟詩笠農先兄  
曾權閩泉

清晨閱今白華堂詩有題倪文貞蘭石張忠烈書江上  
聞笛詩合卷絕句意有所觸亦題二絕於後

赤霞賢裔工文翰酒醞茶香解畫囊示我衣雲閣中筆寒松  
歷落石青蒼吳江史善長字赤霞著秋樹讀書樓  
集其後人藏有倪文貞竹石極妙

詩賡

四四

海上臙腫白晝驕滄桑遺事話前朝金戈鐵騎消沈盡嗚咽  
寒流畫字橋去吾鄉城西十八里有畫字  
橋相傳為張忠烈駐軍處也

題余秋室中允仿唐六如內外丹圖用中允原韻

余君秋室圖龍虎卷送時逢櫻筍天銀燭華筵成昔夢雲睜  
羽蓋證飛僊咸豐乙丑震澤史君為母太恭人七  
十生辰以畫介壽迄今二十七年矣

為恭甫題包慎伯白真真詩後用原韻 五首錄三

曾歌陌上春歸曲曾看吳王苑裏花不信閨中青鏤管脫胎  
石鼎與冰車真真詩風骨堅凝故  
以石鼎冰車擬之

雲鬢縹渺驚鴻逸星頰分明映水澄倦倚篷窗送斜日落花  
片片上魚罾

包子文章匹周保魏默深閒情摹繪到名姝直將天問堂中筆  
縉慎伯屈子祠天  
來向清溪弔小姑問堂額最知名

攜外孫姚三壽等游清涼山憇地藏殿讀壁閒姚惜抱  
先生崇正書院記用温岐游清涼寺韻

天際精藍百尺開梵聲隱隱出林來秋深游屐尋詩至日落  
枯僧乞米回榭葉當門如颯雨桐城遺碣半侵苔何時築室  
清涼側江上寒潮送晚雷

再往清涼山兼懷魏伯孺

寂寂深山草木香又拖筇杖到清涼霜濃不讓顛毛白風暖  
能留病葉黃

山僧云今年天暖木葉黃而不落

物外逢迎從老衲人間興廢

問空王

伯孺爲默深先生子父子皆深佛乘

論文舊雨今餘幾只合曹騰赴醉

鄉

九月二十四日同人四松園看菊遂游清涼山返飲醉

廬卽席有作

詩賡

四十五

青巖崩劣試芑鞋卻喜高秋少長借半郭半村迂叟畫一年

一度太常齋

是日素食向年同人看菊四松園亦素食也

功名汗馬猶前日

有王榮椿軍門蹤跡閒鷗愜素懷最是黃花偏愛我又催好景上詩牌

冶城中秋夜獨坐柬愚園主人

譚藝論交念昔儔寒鐙脫葉冶山樓詞場漫浪誇黃絹宦海  
浮沈信白鷗春夢幾經庚蟀換秋風吹集古今愁多情最是  
愚園叟月落金樽尙未收

尚仰之明經

兆山

以江總碑殘拓製爲便面見贈賦謝

徵君捨宅梁陳際錯落驪珠廿七餘隆闡吳文同體製不徒  
聖教證鵝書

句溪上舍勤搜古收拾殘珉喜欲狂一握清風慙惠我袖中

常帶貝多香

送沈筠生州守國翰之任海州

春風江上喜停驂治跡羣誇製錦堪雀鼠能平棠勿翦蝗蝻  
不害稼仍甘州守宰上元歷著政蹟雲臺稅駕人爭迓露冕巡農俗定  
諳行見政成兼訟理三年報最

帝恩覃

清明後一日愚園主人招飲是日陰雨因病未赴用東

坡苦雨韻二首柬主人

我友期朋簪看花宜酒食良辰過百五韶景足珍惜那知天  
霖霖春意轉淒悲病夫畏寒洌閉戶夢香雪泉火雖應節杖  
策苦無力遙憶園中容賞雨命浮白

蕭槭冷城居雨鳩鳴不已亦有桃花林零落深山裏雲陰積  
泉石寒聲亂竹葦那復春游興低頭鑽故紙寂景守雲亭清

詩賡

四六

風懷甫里何當晴蠟屐老病霍然起

愚園和詩久不至再用東坡韻促之

山棲春日陰把卷恆眼食流光已改火分寸須愛惜風花泛  
樽酒絃緩緩庭瑟藜榻濕侵苔茗爐清沃雪坐憶西園勝曳  
屐嗟乏力寂寞倚闌干一樹梨花白

自識苔溪隱

宋胡仔號苔溪漁隱

愛我情無已醺酒層臺上彈琴深屋

裏昨投寒食詠黃茆兼白葦坐待詩霏屑未見珠落紙碧雲  
期不來寂寂修竹里明朝逢上已禊事又提起

汗梅岑教授

時杰

白下新居落成招同范月槎觀察李

羲琴大令

張翼

蘇慶生少尉

有桐

戟門莘農集枕經

養壽之齋卽席賦呈

斗酒相邀喜率真秦淮佳處卜居新宅身奚必萬間厦促膝

相看四老人 謂月翁義琴主人及余也 堦下蘭蓀齊吐秀 廚中櫻筍尚餘春 陶然一醉游懷葛 世事何知海上塵

題篋中米帖

結習襄陽說二樓 吾鄉王氏夢樓朱氏竹樓 余兄查客續前脩 子舟先兄別號查客 年年窗下蠅鑽紙 白盡髭鬚七十秋

范月槎觀察招同辟慰農觀察陳幼蓮王部 宗濂 韓叔

起比部 弼元 陳小浦主政孫澄之太守李芋香提舉

嗣泌 秦伯虞 際唐 劉恭甫兩大令馮夢華直刺 胸暨

愚園主人在愚園作歐陽文忠公生日紀事四首

在宋景祐初歐范同登朝范公守開封羣小如螻蛄歐公力抵爭一正斥百器卒與范同貶風義傾廷僚先生希文後舊德訴匪遙灑掃園中廬瞻仰雲中輶堂下紛竹木堂上升荔

詩賡

椒憂樂千載同勝事知不祕

穎翁在京師屢薦歐齋 林穎叔方伯是日因病未到方伯別號歐齋所懸公像歐齋善藏也 西園今領袖乃在僻夫子夫子公部民食德歷百祀滁中亭

就荒木石委荆杞召工亟建修傑構媿前美坡書斷復完響拓日百紙青山宛然笑流泉清且駛我公驂鸞來聞之輒然

喜

韓子向語我亂後經維揚曾作湖上游謁公平山堂起堂者何人吾師定遠方詩名邁德水禊事希漁洋苦為首署羈未遂籃輿將西川不得意間坐詩酒狂平生山岳懷一別逾十霜白髮老門生愁思海茫茫  
嗟余少失怙常懷風木悲撫持仗我母畫荻念調飢余兄錫余名曷不廬陵師質鴛復命蹇傷哉拙文辭瀧阡表何日思

之淚漣漣吾兒幸策名表微當有時一蹶出禁省乃與民社  
期夷陵有前型何弗效法之吾生願未遂望子亦奚爲

月槎觀察惠蒲團獨坐圖因題用前招飲詩韻

不裝聾啞不癡顛默默維持大願船第一懺除先舌劔百千  
長養是心泉功耽寂處何妨獨坐到忘時並離去禪屏卻錢  
刀並文字蒲團一箇送殘年

題畫

尺幅具紅梅水仙石盞  
香襟丹柿百合如意

霞軒縹緲雲外至結袂癯仙水石次黃香撲鼻朱實堅位置  
齋中百如意

同作

外孫姚元壽

盈盈白石帶朱霞妙筆丹黃處士家醉舞庭中竹如意夜  
涼開到月中花

詩贖

單六

題月槎觀察秋懷詩後

少陵賦秋興凋傷寄哀思昌黎賦秋懷悽惻寓古悲唐室際  
衰替累多危苦詞先生生昌時文譽滿京師棘闈一戰霸橋  
門多士隨

天子子優秩敷政邗江潛精專職文字顯要登監司胡爲感  
商節乃與秋士期丈夫抱偉略管葛相攀追四夷資鎮撫百  
姓憂阡危功名未滿志居高猶處卑俗子美光榮志士恆鬱  
伊發言爲心聲意旨存風詩我少事咕嗶攻苦勤下帷亦有  
用世志豈爲干祿資髮白今已矣萬念俱芟夷先生肯我顧  
謬叨國士知書堂燈熒熒賞奇而析疑境地判喧寂唱答如  
壘篔中宵諷嘉什聊拊拳拳私

原作秋懷八首

秋入江城何處尋蕭蕭落葉下疏林斷雲在水雁初到涼  
月上階蛩自吟湖海十年蘇子夢風煙萬里杜陵心拋書  
攬鏡燈前照無那衰遲鬢雪侵

金鼓關山靜不譁樓船落日正棲鴉風聲慣攪羈人枕霜  
信偏遲海客槎作賦悲傷思永叔上書太息憫長沙

謂樊雲門

太登臨正待攄懷抱無限歛獻越石笱

著鞭誰讓祖生先局外觀棋憤未蠲潮汐漸平風又起脂  
膏已竭火猶然憂時枉切張平子排難終思魯仲連自恨  
虞翻無骨相看人高閣畫凌烟

中歲頭銜署瘦羊世人都笑次公狂青雲退避伴三舍白  
下來游又六霜校士屢參文字役忘形喜入少年場耽吟  
不爲窮愁減日日蕭齋索句忙

詩贖

四九

閱盡滄桑感慨中祇將心事託枯桐滿城風雨吟卻老十  
里烟波夢放翁薄恨仍憑詩力卻閒愁須借酒兵攻冶山  
叢桂西園菊取次留題證雪鴻

富貴浮雲付夢婆軟紅塵憶昔年過銀河慣阻星槎路玉  
宇誰憐水調歌時事升沈如海市詩情蕩漾似江波心腸  
鐵石堅難改賦到梅花俊語多

歲月駸駸去不留看山乘興約朋儔名心淡似詩中畫宦  
况浮於水上漚句有人傳差免俗事能自反不招尤平生  
省記無多語欸段追從馬少游

頻年薄宦歷江湖回首觚棱感戀俱生子浪邀騏驥譽

豚兒

厠名史館友人來逢人且任馬牛呼蔣山雲樹供憑眺栗  
書輒有過情之譽

里田園恐就蕪鎮日登樓情脈脈思歸豈必爲尊鱸

病起二首

駒光七十太匆匆一病能令萬念空稱藥難回霜鬢綠淪茶  
靜對雪爐紅君親舊恨何從補文字前緣儻未窮自歎根塵  
銷不盡強扶藜杖話春風

已是桑榆有限年世情到眼總如煙人嗤處士空求死我羨  
書蟬浪得仙第一江山仍在夢尋常飲啄且隨緣作詩爲報  
希文老準備谿堂倡和箋

與峨嵋山僧海澄夜話用太白贈蜀僧詩韻

草堂今夜月聽說大峨峯寺倚飛來嶂濤喧太古松寒霜欺  
舊衲積雪斷晨鐘動我巖棲想秋雲踏萬重

送廖養泉觀察歸四川

記出梁溪道循稱萬口同胸陽重布治教化繼文翁君新修石室書

詩廢

五十一

院盜戢刑祛猛民和歲告豐懸車年未及歸思已巴東

琴鶴廉聲著君嗜琴歸日以一鶴自隨雲龍道望尊雲臺爲海州望山有古松號盤龍丈人

書名齊瀆井桂氏未谷號瀆井復民筆法湖平原觸手牙籤富軒眉玉

樹繁林亭足幽悅尺素定相存

月槎觀察招飲出示天河硯題贈二絕硯鑄雙星象甚工

何來天上支機石合註人間博物館錦軸牙籤青玉案今朝

同泛米家船

翩翩才調羨諸郎出手文章錦七襄芸館薇廳同載筆詞源

屈曲瀉銀潢

贈鄭雨辰貳尹書翔

落落風塵裏斯人節行堅觀書勤夕課奉母覓晨鮮道以微

官屈文猶下第傳君丁卯落解重爲時惜南中事方棘佐治正須賢



辭廬十詠

寤園

明茅莊生構園鳥龍潭上今存其名

俠客兼詩客茅生昔擅場譚兵遼海上買隱白雲鄉舊跡滄桑改新蹊草木香一燈潭上宅遺事說高陽

莊生曾參孫高陽軍事

永今堂

溪堂溯老米雪堂懷髯蘇辛劬布水石勞苦薙榛蕪大賢勤教育門多問字徒度地建崇構都忘心手痛築軒臨深潭開門對層嶺夫子莞而笑竹木弄清影載費朝停車持觴夜說餅不知冬雪深但覺春風永

冬榮春妍之室

歷冰雪兮節不磷被和風兮百卉新惟夫子之文翰兮下筆自具乎冬春

詩贖

雙登瀛堂

瀛州風暖春草長兄弟翩然來

帝鄉闈中下筆雲錦章一雙雷劔冲

天閭恩榮宴上飮瓊漿棣萼連理齊騰芳歸來堂上拜家慶人說河東雙鳳凰

仰山樓

巍巍仰斗山昔駐明湖西移席來江南多士蒙提撕凌霄百尺樓攀切青雲梯

吳甌書屋

金石縱橫揚子廬壁間遺堦湖東吳當年若使留文字足抵崗頭皇象書

天發神識碑舊在上元段石崗

百丈龍蟠話舊都吳宮花草已模糊武侯近日新祠廟無復

殘碑問赤烏

有叟堂

山蒼蒼水泱泱功臣湯沐邑君子讀書堂  
篋有新詩樽有酒敲門共詣桑根叟

夕好軒

策杖眺寒山呼童展琴席風來池上軒  
雨過長林夕斜陽度木末蕭灑動詩懷  
莫說黃昏近朝朝山色佳

半潭秋水一房山

沙汀小雨初霽林野白雲自閑架上一編秋水屏間幾筆房

山畫史高克恭字房山

蟄齋

不爲龍騰甘爲鵬息動則建業靜乃養德

詩贖

五三

題李如睂世丈文榮重游泮水詩後

潤州富人文賤子實培塿幸從先達遊得覲如睂叟負天人  
資論才不計斗落筆妙猶龍聲華古無有七試七膺薦高  
文嬾瓊玖鴻鶴儕燕雀聘珍虛席右四十罷朋試功名等敝  
帚樂志愛邱園娛情植花柳名公爭下車門生羣載酒妙技  
擅岐黃神奇異眾手切脈湊單微祛邪供臂肘揚淮暨江淞  
聲名不脛走歲月爭如馳霜華漸上首鼓篋溯庚戌年齒甫  
十九思樂籛有徒英奇實寡耦俛仰七十載同輩已無偶重  
作泮宮遊

盛世臻仁壽叟倡陽春詞和者羣恐後中閱幾鷓鴣舊事在  
人口季君幸同雋膠漆誼孔厚爲賦重游詩下筆苦塵垢草  
草搜枯腸不惜蕪詞莠強顏附弩末敢期言不朽

贈吳子實學士

寶恕

作賦摩空萬丈苾承

恩持節出

天閭論文芸局勤三駕訪舊棠封到五羊多士騰蛟才入殼  
累年積蠹弊能防明珠慧苴憑公論清白傳家食報長

秣陵何幸迓朱輪揮塵論心四座春上相到門親問俗故交  
捧袂羨抽身燈前願曲情偏暇酒後裁詩筆有神海內澄清  
仗公等秋風莫更念鱸菘

和作

一串驪珠作苾詩名久已播吳閫傳家文筆誇鳴鳳蓋  
世功名恥爛羊吏隱金陵爲士楷家居鐵甕究江防藹然  
氣象眞儒者杖履逍遙計日長

詩贖

五三

名材大雅此扶輪幸我追陪滿座春學舍如舟隣弱弟宦  
途息轍得閒身臺荒鳳去空懷古潭靜龍蟠若有神慚愧  
雷門持布鼓歸心已逐五湖菘

煦齋太守以丹橘蒸羊饋歲賦謝

年年苜蓿詠闌干佳節承筐喜助餐白苳登盤稱去朋饗黃  
金滿橐洗儒酸遠從溫郡徵仙品永嘉橘錄分三品近爲倉山補食  
單料得北堂朝進膳珍饈嘉果佐承歡

李君實摹梅道人松石戲作梅道人欵題二絕句

竹懶愛習梅沙彌怪石長松酷似之無端贖作河豚本持向  
街頭嚇市兒

贖本河豚亦足珍醉鷗風格故超倫竹懶亦號醉鷗蒼松爲友石爲  
丈恥與李桃同結鄰

松陵十憶詩

虹橋茶舍

樓中風日晴江上烟波夕酌酒向垂虹爲弔吹簫客  
有茶樓在垂虹橋之東春秋佳日余樂與二三友人談聚  
於是右顧垂虹左顧三高祠及鴨漪雪灘諸勝擬價買之  
爲菟裘計有志未逮今思之猶怛怛也

頭天門

一入松陵境沿洞石岸長雲埋通隱觀藤習首忠坊

通隱觀謂華陽道院時興時廢觀左有周忠毅公石坊明  
吳江縣熊開元立首忠字則董宗伯書以旌其門閭也

挹秀閣

妙挹湖山秀樓居笠澤東殘碑付兵燹何處覓泥鴻

詩廢

五古

北門外華嚴庵中有挹秀閣余與少甫娛庭漱雲臆詠之  
所道光乙卯姚君抱勤卸震澤事同人飲餞於此作笠東  
鴻迹圖勒石閣下今不可問矣

龐山湖

僧居隱荻叢漁舟維石堰妙詠屬唐侯自誇山水縣  
學田多半在龐山余常往來於此唐陶山龐山湖詩贏得  
人稱山水縣

松陵一壑

池上水淪漣林間石鱗次清波及嘉樹妙絕衡山字

園在郡廟中邑令唐陶山左青糴屢修之有楹聯云暫借  
清波醫俗吏好留嘉樹蔭蒼生衡山手跡也

鴛脰湖

樹密雲深護橋多岸曲迴湖波依舊綠琴隱已無臺  
湖中舊有平波臺湯忠愍易名琴隱亂後臺圯

夢逋草堂

隱逸林君復茆齋結構如牀頭春木集篋裏爽泉書  
夢逋草堂爲金澤陸日愛讀書之所陸故籍繫吳江也姚  
君春木爲陸文字師所藏高爽泉書最多余得四紙

汾湖

田園依竹葦屋宇露茅茨最妙扁舟趣湖烟未泮時

汾湖去吳江七十里己未庚申之間友人多避居湖濱余  
時至焉

李氏酒樓

屋小不居市酒清能醉人黃墟老夫婦先後委埃塵

詩賡

五五

李氏夫婦無子息賣酒吳江頭天門之河濱屋宇清潔無  
纖塵雜花窩石雅有深致乙丑復過之荒榛遍地無可尋  
跡矣

世月堂

丈室借僧廬閒門掩雙樹忽逢載酒人春風生杖屨

世月堂在吳江甯境華嚴寺余以學署逼窄遂賃居焉學  
徒如芸舫中允望雲祭酒賞奇析疑皆集於是

崇川八憶詩

支雲塔

寂寞魚龍窟高寒鸛鶴窠吳門雲隔絕一塔鎮滄波

狼山去崇川八里春秋佳日曾同李小湖學使及諸生宴  
集於此同人皆買勇登塔余謝未能也

黃泥山

一老籃輿穩三秋木葉多黃泥山下路夜夜夢經過  
昔同戴笠樵余秀珊兒子樹禾爲五山之游黃泥山蹊逕  
最幽秋深木落迥出塵外笠樵有紀游詩云中峰窺面目  
峭壁抵丹青樹老旁生幹藤堅屈作門等句

魁星樓

傍水結樓臺開軒侶鷗鷺春來蘭葉生道士歸何處

魁星樓四面皆水張道士善種蘭余齋蘭花培灌收藏皆  
倚之近聞已鶴化矣

習家池

晴雲集軒蓋明月響箏琶江上念憂館風流說習家

習氏池亭幽雅主人賢而愛客吾輩觴詠半在習園迄今

詩贖

五十六

夢寐係之

元武殿

清游往城北琳宇半欹傾落日尋樵跡秋風動雁聲

北門元武殿人跡罕至秋日登眺最宜

白蒲鎮

白石家何處休文跡已陳懷人夜無寐落月在船唇

乾嘉間白蒲姜靜宰兄弟最知名余至崇川與沈君笠湖  
亦極契洽笠湖久歸道山余猶時時念白蒲也

石港

纔脫風波險方知魚米香卜鄰依北極

閣名借我讀書堂

余庚申渡海卽僑居石港屋宇窄隘閣中住持僧有閒房

借余讀書余書篋研具皆置閣中

歲寒堂

五年羈宦轍三友訂朋簪身世浮雲似寥寥歲暮心  
堂在學署之左為論文讌客之所庭多古木梅竹皆余手  
植歲寒堂額同年小湖學使所書也

成豐王子震澤費生

榮曾

持寶晉書院圖來售蓋其祖

玉衡先生盡室生涯寄京口圖也圖為夕庵老人作

亟購之以備吾鄉文獻題以志幸

夕庵原題云玉衡先生掌教吾鄉實

晉書院一時從學者甚眾兒子深亦與焉先生家震澤恐數歸省致諸生有廢學之虞乃攜眷屬居之爰

摘宋人盡室生涯寄京口句命余為圖時嘉慶十一年三月廿又四日丹徒張峯

禪堂寂寂森松檜講舍沈沈奏管絃此是兒時釣遊地

仁宗皇帝太平年

命作

孫星馭

詩贖

五七

自從寶晉名齋後課士廬成絕市囂雲墮檐前山欲雨風  
來枕上海初潮畫圖猶帶松烟潤竹石曾經劫火燒幸際  
吾宗重建築郡尊粹甫太年願隨羣彥共舒翹丈庚辰重建

題趙千里金碧山水

海上巖巒現金碧雲中草樹護亭臺此間合有仙人住徐市  
樓船那許來

為李東原司馬題徐東園仿管夫人竹

記過南州徐孺宅評書讀畫共襟期難忘修竹風燈裏三五  
詞人被酒時

夢中得溪頭昨夜二句醒足成之

卜築江皋遠市譁疏籬一帶野人家溪頭昨夜東風大自掉  
烏篷網落花

上已後三日方子涵學博

培容

甘劍侯秦伯虞兩大令

陳雨生孝廉招集薛廬展禊卽席有作

春在烏龍潭上廬滿園桃李一牀書張鑑夜集談詩叟問字  
朝停載酒車湖上復追林隱樂河東爭道薛公居蒼涼六代  
煙花窟又見江山綺麗初

年年留滯在周南喜與諸君筮盍簪白髮蕭蕭俄七十青陽  
冉冉又重三匡時各有經綸寄處寂豈徒林壑貪我有戴公  
山下宅會從舊侶覓雙柑

辛巳大雪後慰農觀察招集淡靜山房用東坡石鼓歌

韻

太歲重光月在丑先生折柬招梅叟西巖大雪謁神祠江上  
玉龍挾雲走昔年駐馬相城郭丞相勳名在人口東風赤壁

詩贖

五六

怒濤腥赫赫軍聲建安後賊曹股栗竄如鼠大勢青徐吞八  
九遺芟常留召伯棠去思豈比桓宣柳戰戍淒涼五丈原中  
夜大星落如斗白衣江上恨終古伊戚自貽患生肘孫家遺  
孽恣淫昏作室毀垣痛稂莠大名萬古雲霄垂雷車風馬常  
爲友千載東吳飲公德有似羣雛蒙乳穀河東使者張文幟  
大筆蛟螭賤蝌蚪門生桃李列青衿賤子桑榆奉黃耇盈庭  
蘭芷盡舒翹下土詭隨遭指喉六朝人物集參禡二月風花  
照樽卣雲龍角逐韓孟交一代笙鏞振矇瞍仿古層坡樹碑  
碣八陣威名儼响嶼開巖鑿道集竹木度建崇祠基孔厚冠  
裳文武釀錢幣大書貞珉記某某征西討虜遭罵唾香火乃  
爲西川有乘潮白馬閱滄桑隔葉黃鸝喚榆柎平生志向在  
伊呂那數功人與功狗祠前潭水清且漣落日漁樵聚儕偶



表忠廟似闢湖西墮淚碑如經峴首歲時伏臘走村翁杜銅  
鼓家家爭擊培我家北固滄江上甘露殘碑供搨取山中狼  
石幾風煙落葉蕭蕭苔積垢伏獾庭下勢突兀疑有鬼神暗  
呵守我今匏繫建業城拙宦聲名知易朽載酒年年問字來  
讀書廬並江山壽

星馭註淡靜山房  
在諸葛武侯祠

徐青藤山水爲陳小浦主政題

牧兒據磐陀念卻簑與笠犍牛驅入水不顧漢書濕

牧牛

村童報梅信振衣出山郭清風扇人間卽是雲中鶴

閒雲野

鶴碧天高

陰雲江上積飛雨浙東來不識風濤險乘船不肯迴

山水戲

墨

釣水豈釣名名高謗乃起所以熱中人紛紛隱朝市

桐江千

詩贖

五元

古潺湲水不釣鱸魚只釣名

獨樹集秋聲虛窗延暮色風送萬鴉來夕陽半天黑

鴉噪夕

陽多

鍾君入南山書劍何翩翩赤鬼弄遊戲破蓋飛上天

終南進

士

巖壑千盤險藤蘿百尺長停樽酌蘇子那更憶周郎

赤壁夜

游

陰崖雲坐濕長林風怒狂天色黯如墨觀書若坐忘

且還讀

我書

但知逸民樂那惜下士笑相向欲無言有言亦微妙

停斧收

綸話太空

烟雲領夕霏林壑耽幽境高臥到羲皇不覺衣裳冷

臥雲

此是指柳天念宅安在四月七日  
社社且與沙中夏五回安身居社社  
王夏夏為合

京口人來述吾鄉春社賽會最盛詩以紀之

社事城南舊年豐習尚仍香雲團寶蓋璧月簇華燈夏五鄰  
佳節秋千列上層抽毫紀風土鄉思一宵增

寄莫善徵直牧 祥芝 上海

使君望重百僚班坐撫華夷指顧間強項不知丞相貴 曾文

兩江日君 兩事政言論心偏愛校官閒胸中自具萬千厦海內羣推大

小山 君與兄子德 先生齊名 何日長干重結襪一樽江閣笑開顏

雜感四首用月榭觀察詩韻

身似孤桐百尺脩漫隨散木賦舟流官貧聊戀三升醞累重  
難為五岳游伴我蠹蟬消晚歲看人鷹隼戰高秋關河難越  
親朋阻迢遞山郵與水郵

鄉心渺渺託烟波燕子磯邊六度過春雨漁簑懷舊隱夕陽

詩賡

六

銅斗記高歌眼空漸覺紅塵淡道拙何知捷徑多世事如雲

冠蓋開天寒袖手不煩呵

少日關河歷阻脩棄繻縑慷慨邁時流中原雅具澄清意下澤

羞為欵段游鴻鶴由來志寥廓蟬蛄奚可語春秋誰知禿盡

蕭蕭髮束帶低心事督郵

袞袞年華付逝波元亭寂寞少人過生無壯志徒鉛槧室少

餘糧但嘯歌事過殘棋難復理學荒佳句不能多將軍未具

封侯骨灞上何辭醉尉呵

顧少錫直牧 景濂 來官白下把酒論文往來稠洽今奉

攝海州賦詩贈行 四首錄二

平生私淑呂涇野境諡人和見政成建業家家歌五袴衢歌

助我管絃聲

屢向官齋把酒卮又逢五馬過江時何年攜手飛霞閣閣在  
中快讀雲臺望海詩余署

贈尙仰之

地擅三茅秀家餘萬卷儲論文甘若蔗學稼苦忘茶几硯雲  
生席君工 璉椎墨染襦君拓金石刻極精 茫茫塵海裏望古意踟躕

幼蓮工部以嫩冠夫人書畫遺篋屬題

洗妝樓閣已塵封蓋匣重開最惱公人似驚鴻去無迹泥金  
未褪墨猶濃

聞說海棠如有淚須知明鏡本無臺琴囊筆格蛛牽網我亦

秋堂理夢來余少作秋堂理夢圖楊漱雲光祿題句有云知  
否生天離思苦瑤階亦復夢夫容附識於此

爲王子欽太守廷訓題王之癡仿趙千里江南春圖

竹葉青浮十萬箇桃花紅過三千春山中主客忘塵劫定是

詩賸

又平

淵明記裏人

吾家千里工雪景名在清河畫舫中忽寫江南好春色山青

雲白落霞紅

爲臨之題趙仲穆山水

天外山青如潑黛澗阿水急似流銀折梅歸去東風緩羨殺

紅衣馬上人

又爲題顧定之墨竹有吳日  
生跋

江東顧氏工寫竹名與玉山相韻頰我憶松陵吳節士凌霄

千尺挺修篁

初夏集劍池山館

山郭延朝爽池亭遠市囂籬栢柯補竹屋角葉遮桃地靜安  
棋局香清挹盞醪丹房期共醉世事正如毛

寄袁季枚上舍度泰州

渺渺湖波維夕舫，峒峒山閣剪秋燈。相思欲折梅花寄一片，寒雲隱海陵。

余於戊寅冬有退園紀事詩，同人皆有和作。范月槎觀

察三疊原韻，趙梓芳觀察繼元再疊原韻，稿多散失。

僅存梓芳觀察再次原韻一首，鄙人倒叶原韻一首。

並刊以誌唱酬之雅。

垂髫好唸詠，常遭長老噓。萬遍嗜杜陵，四聲研沈約。童心尙未除，靈源頗不涸。但諧土鼓音，那識鈞韶樂。詩法授仲氏，指示先民作。問奇日影遲，得句中宵躍。英聲出黨塾，方欣桃李灼。天高廢蓼莪，水蘖痛咀嚼。篝燈課中閨，母氏悲且愕。書防伏獵訛，途戒忘羊錯。終歲勤文字，無心計蔬臠。猶虞稂不秀。

詩贖

六一

家事付索寞，隨仲入長安。殷勤幼子託，射策稽金門。研治安略心，期羨隼飛身。世遭蠶縛淡，墨際書名三。登終挫落已，之役樹生師出關，曰生卷經某相國已中定矣。注榜時被黜。騎驢過蘆溝，一意向雲壑。寒霜撲菱闌，秋風吹棗萼。苜蓿老一官，宦味澁於藥。三山繫夢思，謂京口金焦北固三山卅載負耕鑿。坐忘竹菴戶，臥游山繞郭。故人幸不棄，相將共杯酌。山輿健黃犢，湖舫維青雀。漫愁詩興闌，庶免離居索。

再和

太湖趙繼元梓芳

我昨和君詩，枯腸強搜索。酸嘶草根蟲，嘲啮枝上雀。競病恐未諧，吟安費斟酌。苦語效東野，濫竽愧南郭。君才萬斛，泉詞源三峽。鑿昌陽與豨苓，悉是籠中藥。無窮鬪清新，天葩絢奇萼。大范尤耽吟，謂月槎同年羅胸有邱壑。擊鉢責詩逋。

意興殊灑落兩軍互挑戰天馬脫羈縛後勁接前茅制勝  
富韜略感事復懷人豪情攄寄託梅叟詩有感舊語扣門送詩忙

荒齋破寂寞我本儉腹人塵土厭羹臠未飭大官珍敢爲

良玉錯勅敵忽相遇氣懾神且愕左提亦右挈曲踊還距

躍所嗟詞采蕪才謝春華灼宦游逾十年閣筆未有作元性

拙吟詠久不爲詩豈謂羈縲餘幸獲文字樂晚學慕達夫祇慮廢

井涸鞭弭相周旋請從大國約此詩當息壤談柄資嗚噓

### 題臥佛寺方丈德和尚六十歲像

曾向天台遇導師科頭跣足雪盈肩無言壁畫掌中字這裏

機關若箇知指和尚往天台遇異僧事

祇園十載落波旬古佛低眉悵劫塵彈指華嚴樓閣現因緣

知是再來人和尙自述如是

詩賸

### 題少庵食舊軒圖四首

軒藏先著梅氏叢書績學堂文鈔及瞿山先生黃山圖冊稠長山水大小立軸隅庵二如兩先生手

書卷冊皆藝苑鉅蹟餘詳少庵自著食舊軒藏先世書畫記

徵君績學孫承學謂君高祖文穆公叠拜

先皇御墨濃世世金陵綿舊德子孫常守百城封

書家秘奧枝園述君祖隅庵公鈇書法中鋒授自華亭張文敏公說見金壇段氏經韻樓集段有枝園

文筆清蒼惜抱知君祖二如公鈔古文惜抱先生題辭許其有高格清氣不徒家學中

西貫他藝皆堪百代師

夜夜書堂虹貫月妙收先世畫書詩能從墨海探津筏那數

香囊王謝兒

我到頤園十三載酒痕墨跡澹秋衫眼看後起庭階秀無怪

詩人白髮影

五月二十八日公社亭林先生生日祀畢集於冷城學

舍

顧家家廟沿明季曾傍朝天結數椽易代經師隆胙蠶一龕

香火續前緣朝天宮舊有亭林先代祠

祠堂初議由莘老祠額名書屬了翁感事懷人意無限九京

何處達魚鴻建祠之議上元孫文川澄之與焉祠額邵陽魏者剛紀書

祠屋慈仁集昔賢我兄曾奉瓣香虔長于今仿長安例歲取

公家辦祭錢京師建祠子貞太史與先兄子舟觀察各出經費以葺事生日之祀歲以為常金陵祠生日之

議自瑞安孫琴西方伯始

經學紛綸宗鄭賈不妨餘事及文章諸君自具名山福多事

羣兒好謗傷此專言咸同以來諸君拊祀者

昔年共讀鋤奸疏馮子高文涕淚多自此靈威緘石室大江

詩賡

全三

白日鎮蛟鼉已卯亭林生日出吳江周忠毅擊奄草稿共讀馮夢華作文紀之旋命兒子樹禾送藏焦山矣

神祠舊是讀書堂修竹寒梅信晚芳昔日故人今配食不禁

清淚落椒漿祠堂為曾文正公書局舊地故大陳卓人太守劉伯山助教戴子高典籍唐端甫文學皆拊祀

中祠

鉛山片石抵兼金出匣煙雲結契深風骨堅凝心樸實一編

忠雅繼儒林是日出觀藏園雲舫硯先是阮文達撰國史儒林傳以亭林為先河繼撰蔣清容傳仿儒林傳

集句以備國史文苑傳採納

自題七十一歲小像

老大足可惜平生憂患侵衣裳慈母淚燈火弟兄心閱世念

龍螭耽書類蠹蟬流光何太速霜雪已盈簪

江上東西冶年年此索居生涯憤齋粥農圃習耨鋤事減參

詩律官微息謗書寂寥千載後望古意踟躕

用聚星堂韻答月老

薄技區區工楮葉坐叢憂謗誰與雪閒門羅雀過者稀戢影  
書城鎮愁絕先生好士偏愛我每手新詩輒心折茫茫四海  
一鍾期千載聲光當不滅我讀先生詩萬首騷壇騰踔如鷹  
掣玉佩瓊琚絕妙辭囊盛古錦墨光纈江湖詩學日凋敝有  
如沙裏求金屑公然贈答走長鬚轉眼風花過影瞥元輕白  
俗浪刺譏有口誰能塞盲說不如閉戶守甌青鈍硯朝朝試  
耕鐵

再用前韻答夢華

晚歲心熏貝多葉課誦不知鬚鬢雪豈有生天成佛想胸中  
煩惱期淨絕江上無家歸未得手版強持腰屢折身入閻浮  
百患纏眼看泡影千波滅明知白社路匪遙爭奈紅塵足難

詩賸

六

挈吾兒賚志中道殂北望黃河凍冰纈清名在世究何補松  
柏已同薑桂屑芸局莎廳成一夢雪上飛鴻去如瞥從今益  
歎常寂樂三災八難何須說他年我佛儻垂憐請視此詩券  
如鐵

題子欽畫二首

元鶴已歸三島去寒梅留得六朝魂琳宮寂寞深山裏跨衛  
衝寒來叩門

陶谷圖

白雲深處臺城寺策杖來游霜葉稠一幘丹黃入圖畫秣陵  
未覺不宜秋

雞鳴寺圖

題祝蔗樵太守 赫 雙桂軒

公府地幽寂就詩結古歡鋤雲花徑開觴月竹窗寒室靜觀  
心澈臺空放眼寬階前雙桂樹黃雪覆闌干

三視齋詩 并序銘

端溪桃葉硯在余篋三十餘年乃石友也光緒辛巳仲冬得蔣藏園硯背有雲肪二字銘之詩之喜而不寐越一月復得揚州馬氏澄泥硯名工劉義叟陶製山陰沈凡民鳳為銘刻於玲瓏山館遂以三視名齋且為之銘銘曰端巖之精麗美星娥遺製澄州價敵官哥白首書叢日日搨抄東坡有言三視已多

橐筆之江去唵詩大海過隨身一桃葉辛苦涉風波

右桃葉硯

石琢桃實為硯切四周以桃葉裹之因名

晚年耽守拙筆硯近將焚何意入闌市傾心遇石君潤餘蕉吐葉滃起墨成雲宗派西江在朝朝受習薰

江左紅羊劫圖書半散亾鉛山留片石為我鎮文房舊曲書

詩賸

六五

香祖寒山沒小倉一隅勤拂拭落墨藉水肪

右藏園硯

銘附 探巖腹截雲肪乾隆朝藏園藏越百年見朱方歸趙氏麋壽堂光熊熊曰硯

祥吾子孫詩其昌

殘冬記跋倪迂畫隱帶揚州烟月痕何意叢書樓上研又從燈案伴黃昏

詩社韓江舊有名汪巢陳投杭大厲樊榭並崢嶸誰知麋壽堂

中客寂寞空山證墨盟

劉子陶工劇精善沈侯詞筆更嶙峋文房他日傳佳製不讓

澄泥呂道人

祝芷堂侍御舊藏呂道人製澄泥硯天籟閣舊物

落落青瑣守歲寒零磚賸壁集叢殘樊川已醒揚州夢

謂馬氏

只當雲烟過眼看

又題



江上歸來話故山包子星南玲瓏館尙在人閒可憐賓主同時盡  
說與蟾蜍淚欲漣

曾見行庵萬竹枝濛濛烟舫暮歸時憑他半尺黃泥硯補寫  
邗江感舊詩

右澄泥硯

初得馬氏澄泥硯硯左側有眞賞圖書印印文圓勁如  
錐劃沙右側有劉羲叟陶製五字沈凡民銘刻未詳羲  
叟何人余亦以爲羲叟固良工也偶閱元本新唐書書  
尾編修姓名有劉羲叟與呂夏卿王疇范鎮並列旋檢  
宋史乃知羲叟字信更澤州晉城人歐陽文忠薦其學  
術該博擢試大理評事趙州推官留修唐書書成授崇  
文院檢討此硯固北宋名臣手澤迄今千有餘年中閒

詩賸

六三

馬氏沈氏皆不得其詳於光緒八年正月乃歸於我是  
年十月乃得詳考羲叟生平事跡物之顯晦固有其時  
歟後守是硯者慎毋輕褻視之今悔道人並記

